

原

富

原富部戊下

英倫斯密亞丹原本

侯官嚴復幾道翻譯

篇二

論國家度支之源

國家度支凡所以衛民身家奉養君上與凡爲一國所必需者溯所由來大較可分爲二一賦於民一不賦於民請先言其不賦於民者

一國財之不賦於民者

財不賦諸民而爲國家之所有者或在積蓄或在土地其在積蓄則國家之收其利也如常人焉或自役其財或舉以出貸自役者所收之利贏也出貸者所收之利息也韃靼如亞拉伯之酋長其所收財賦大抵皆羸風擾畜牛羊售其歲出之羔犢運酪已則爲群之牧長牧其畜而兼治其民雖然部種之中僅以此爲公賦而足以周

事者惟最初之群粗具君主政制者而後能耳。

有時民主小部以懋遷贏利爲其群之公費。此如罕布爾格民主度支大宗取諸酒  
窖藥肆。夫爲一群之君長而可以市醴賣藥。斯其群大小不必問矣。猶有以鈔業贏  
利爲一國度支者。則其群視前爲稍大。此不獨罕布爾格爲之。如溫匿斯如安蒙斯  
他丹爲民主時皆用此矣。或謂雖以大不列顛之大國。苟以版克歲贏。濟其邦用。要  
爲一策。不必斥爲謬言也。蓋英倫版克置母十兆七十八萬鎊。股利百率五分五釐。  
則以常法計之。費用而外。每歲實贏應得五十九萬二千九百鎊。今設英國家以三  
分歲息資此母財於民。取版克以歸官。則每歲當得實贏二十六萬九千五百鎊。以  
濟邦用。非小瑣也。此其言誠非妄發所慮者。吾英君主之國。上下侈富日久。時平則  
浮濫虛糜。若不甚惜。至於有事。輕情妄舉。費常不貲。欲其操奇計贏。若前者溫匿安  
蒙二民主之謹儉纖嗇。逐商利以裨國家。事固有謀於而行。非者吾於或者之說。誠  
不能無疑也。

國家以郵傳公諸其民。取其贏利以濟度支。此亦以商利足國之道也。設驛站於通國之中。車攻馬同。皆出帑藏。而郵政之利。復其所費。猶有奇羨。爲每歲度支之一大宗。夫以商利爲經費。行之於任何政制之國。而皆有大利者。以吾所見。獨此爲尤。其前斥之耳。既爲不多。章程曉然。無難辦者。故不獨贏利之復。有恆而可恃。其事舉利收。若影響也。

案郵政無論何國行之。皆有大利。他政往往經久而弛。獨郵政則日久愈信愈捷。而愈有利。此其樞機在國家之利與齊民合。上下同心。必求其政之至善而後已。故能然也。國家之利在於郵傳之日盛。羨餘之日優。而齊民之利在書札之棧通。音問之靈捷。是其合者也。然亦有微異焉。國家常恐郵資輕減。謂減則妨於財賦。而民則謂郵政之設。當以便民爲要義。且書札交通。事關民智。故郵資可減。則當減。且資減郵多。國家亦未嘗失也。是其異者也。爲之折中其說。則民議優矣。

王侯君公好貨近利。常不惜以貴位尊勢。就匹夫市儈之汙處。雖然。彼能得所欲者。

亦備耳。蓋懋遷之業必勤苦節儉而後有功。以彼驕奢淫佚之人。冒而爲此。無惑乎什八九敗矣。即有然黠之臣僕。爲之營遂。顧此曹之意。皆以其主之資爲無盡藏。買者不必在賤。賣者不必在貴。一事之立。一貨之致。往往支粗於幹。脛大於腰。既爲王所用事之人。其居處飲食。亦擬於王者。脫有簿責。彼上下其手。則浸假與王者埒富可也。觀馬奚威爾所記黑諦思王羅連楚經商之業。可以鑒矣。虛糜僭濫。所費卽由率之佛羅林司合衆之民。乃鳩金爲償所負。而羅亦由此罷業。終其身不復言貿易也。

事之必不可以一身兼治者。莫若治國與經商矣。往者吾英印度大東公司。卽以經商而欲兼治民者也。既以逐利之醜。而爲汗君。又以臨民之尊。而爲脩賈。則交相失之道也。向也彼專爲商。則商業整齊。而合股之家。皆有贏息之可望。自其兼治民之事。遂至三百萬鎊積資。轉瞬告罄。且求助於英國家。以救不可收拾之敗衄。蓋前者專治商業。公司儲貨之業。皆以賈夥自居。自兼治民。彼固儼然官司之吏矣。官司之

吏其所以臨人自將者與賈夥固有間也。

國之度支不獨出諸財之贏利也。其出諸滄貸之子錢者亦有之。蓋使府有餘財而不爲經費之所待用。則出之以貸外國可也。即出之以貸國民亦可也。此如瑞士之補納。其中經費仰於息利者甚多。其積貨所貸之國則英與法爲最鉅。凡出財以貸他國。其穩固與否視貸者用財之治何事。其政府之信謹儉奢。其國民之安危治亂。與其外交之和平否也。至於戰爭之際。使貸者之國舉措不中。一舉事之頃。雖貸者盡失其財可也。今世以本國餘資出貸他國者。獨瑞士之補納民社爲之。他國未爲此也。

罕布爾格有公典庫名狼跋氏者。受通國民質。歲息百六。公中用此得費歲不下十五萬庫倫。每庫倫約四先令六便士。是公典庫歲助度支三萬三千七百五十鎊也。  
(今英國倫敦鈔市版克林立號狼跋氏街其命名昉此。)

彭斯耐花尼亞國無積聚。其政府造寶鈔以貸民取息。佐度支。其鈔約十五年取值。

民欲資者以地爲質。價必倍所資之鈔數。而國家以令使民視爲法償。得上下行用。無所沮。如是每歲收子錢約四千五百鎊。彭固儉國得此其費已大半矣。夫鈔必若干年而後可轉爲真。是無異於不轉之鈔。顧其事可行而不至窒敗者。是有三故。一國民於金銀二品外。更需他種輕簡易中。抑或進口貨多。所有金銀出以爲易者衆。二政府恭儉安固。素爲國民所信任。三造鈔有節。所造之數與所需金銀見幣之數正同。設三者不備。其事將廢。故北美諸部用鈔者多。然皆以無節貪多之故。利少而害多也。

案羅哲斯曰。往者北美諸部。嘗聯約造鈔通行。意以便民富國。而於斯密氏所指三例。忽不加省。則行之無節。爲國家致邱山之負。貽害閭閻。靡所底止。此緣世俗之意。以一國政府具無限權力。可自無生有。製爲楮幣。使民間永永流行。不問何時。可以轉爲真幣也。古及今如一邱之貉。不知誤者幾何國家。幸今者吾歐諸政家。稍明計學。不致重尋覆轍。議院中有舉此說。人人知爲狂言。雖有利口。莫與衆。

聽無異治幾何者言能言員爲方又如治力學者言能爲常動不息之機也  
又案中國自南宋來每遇國用乏絕皆思行鈔然往往敗至道咸則有鐵錢如當  
十當百諸重寶此與不轉之空鈔特五十步百步異耳故國法大亂而於國家終  
無益也近五六年來中國大費數起軍興賠款諸費勢將不堪吾恐搜括不足必  
有淺夫不學之徒更動國家踵此覆轍者則民生焦然不終日矣後有君子爲國  
言財利者尙深思斯羅二子之言可耳

雖然以前數者之道理財皆非爲計者之經道蓋爲國之道如置器然必處於安而  
後可久久而後可光大也夫欲國之安則邦用必求之於有恆可恃之源而前數者  
以言可恃有恆遠矣故由是術者必其國狹民寡而後可使其民進於游牧吾未聞  
以前術經國而可久也

夫有恆可恃之源莫土地者故進於游牧而爲地著之國者則有公田而以其租貢  
供其國之經費古者如希臘義大里之民主用此制蓋久而國用以舒即至中古歐



洲諸國其王亦私土壤號冕旒地歲取其租供王用焉

冕旒地有畛而古足以供國用者蓋古與今殊今國家常苦不足於費者則兵政一事爲之也特餼糧具車馬稱干比戈至於征行交綏皆有莫大之費此其國之所以困於糧餉轉輸也於古不然希臘義大里之民主也國之齊民莫非兵者自道路至於疆場徵發之後皆其民之所自供故雖數戰於國家費少戰之費少故雖冕旒地之所出以供邦用有餘

歐洲古君主國相矜以武略民皆習戰故於徵發調戍無難拂特之制遇軍興民之應調者常自給費或出於所屬之小侯會長國王固無費也至於他政之度支則以文物之治初開爲數蓋少莫重於訟獄則不獨無費且有所收其國有要功若梁杞若道淦與夫城堡河渠之事每逢秋收其先後各三日發發公徭足以周事矣當此之時冕旒公地之賦王所用者舍官府而外無所仰也若夫王朝之臣隸亦有之矣主藏少府爲之理財主收發長史官尹掌官府一切之政車馬則有大僕僕射領之

所居府第皆高閑閑厚垣墻設睥睨備寇盜與非常也王府諸衛之官蓋猶後世之總管而時平所祿於王朝者祇此區區文武數員已耳故以冤旒地所收者當之常綽爾而有餘也

案羅哲斯曰中古之世王用所仰諸冤旒地之外尙有他歲入者蓋拂特之制如此考之古史知其時國王所築砦堡皆擇國中要隘爲之平時周巡傳食諸砦堡有總管指揮之屬以爲掃除供給之隸自大疫之後民戶日凋疎公地賃傭以耕不敢所費則募民占田歲貢其賦而國王傳食諸砦堡之事亦自此罷也

自今日之治而觀之使歐洲君主諸國盡籍封內之田以爲王田而取其租以爲邦用吾恐其所歲入即以供平時之國用猶不足也請即以吾大不列顛爲喻夫大不列顛之國用當其無事以一千萬鎊爲之而稍不足者也而其國之地稅則不及歲二百萬鎊之額地稅者其賦於田租每鎊征四先令者也足爲什二之賦今其賦既不及二兆矣則以比例言其通國之租固不及十兆明矣十兆者大不列顛之歲費

也。故曰使盡籍其田其所收之租猶不足於歲費也。然此猶謂往者不及二兆之地稅盡出於田租也。乃不知英之地稅雖名地稅其征者不盡皆田是劣二兆者出於田租者固有之而出於屋租者亦有之出於母財之息利者亦有之其不征者特出貸國債之歲收與夫斥以治墾田疇者耳名曰地稅其所征者實以屋賃財息所得於邑居者爲尤多如倫敦地稅則十二萬餘鎊矣威明斯德則六萬餘鎊矣淮陀勒聖哲母斯二宮殿則三萬餘鎊矣其他拓溫若他錫特皆比例而征之凡此皆屋租財息之賦無有算於田租者矣夫使二兆之賦皆出於田租通國之租且不及十七矣矧所以爲此二兆者有屋租財息之賦而二者之賦且居其大分也耶則通國田疇之租不敷國用尤顯然也或則謂當履畝定賦之初其課租多不及實其與真租合者不過一二郡而已故謂英之田租一宗已及二十兆之數此言予不敢謂然就令如此其私租雖及此數籍爲公田官吏疎於課耕濫於用財而刻於待衆其所收之租不及私家之半可也不及私家之四分一可也總而言之使英之冤荒地其廣

妄過今其治田之道必劣於今其所收之租必不及於其舊勢有必然莫能通也

案英國地稅於國德之朝乃用助法至明末國中內訌改用民主則行月會月會者諸部舉長老月估其中所出比例出財必濟其時之國用至一千六百九十二年威廉屬理亞令民收地租一鎊者歲納四先令推之他取入利征亦同此號地稅其第一年所收計一百九十二萬二千七百餘鎊後不逾此故斯密氏云劣二兆也

夫通國富民之歲入其出於地者乃與地產爲比例非與田租爲比例也各國地畝之歲殖子種而外則以資民食或以易他貨爲民用故無論何事其能抑損地產使之宜多而不多者其所損於齊民之歲入過於所損田主之歲入也蓋田主之所得於地產者不過其租而租在大不列顛之中罕有逾所產三分之一者然則使以一法治地其租爲歲十兆更以一法治地其租爲歲二十兆而二者之名租均居三分之一則田主用前法損者不過歲十兆而齊民所損乃三十兆也其所留以爲子種

者固不計耳。如此其民生之不審，必適如此三十兆所減之數，而害之深淺，則視其民奉生之事爲何如。貴賤相去之異爲奚若也。以地爲國家私產，徵其租入，而國用仰焉。此今歐洲諸文明國所不爲者也。雖然，吾觀諸君主大國中，所謂區爲禁地，以爲王者私業者，尙廣且衆也。其地大抵多林園、闢名林園矣。而行數十里不見一木者有之，彌望荒穢，驚砂飛蓬，於養民殖財二者均無所益。向使列國君主盡斥其禁地以售，所得於價，當至不貲。然則轉之以消償其國債，以復其所舊質者，其有裨財政較之禁地之所出者，豈可等量而言耶？近世治闢之地，登租豐厚者，大抵通三十稔之收，以爲售。禁地不開，得租益微，則通四五十稔之收，至六十稔者有之。使列國斥售禁地，則舊質可復。此爲當前之利益。數歲之後，荒壤悉耕，則國家財賦之源又進。蓋化禁地爲齊民產業，民力得有所施，地實告登，民食裕而戶口蕃，民財既豐，則賦稅自阜。後此之利，乃益大也。

故國君據禁地以收其所登，歲有經入。若於國民無損者，而其有損於群，實常較取

民他財爲更大。爲國民計。不若總禁地所收之數。出專賦而悉供之。而後取禁地以分於民。發市出售。使各得之以爲私產。

而國家所宜有之公地。則苑囿林墅。凡以供通國之觀遊。爲國土之景物。與夫四達九軌。所以爲通者耳。此則不徒無所賣出也。欲其地之常通常治。且宜歲出經費以爲之矣。

故國中財產。所不賦於民。而國家可收之以爲經費者。不外二塗。曰公積之財貨。曰封禁之土地。而二者之所收。既有損於政體。又不足以周事如此。則文明治進之國。欲國安而政舉者。舍征民之財貨力役。其道無由。故民各出賦稅徭役。以供公家者。化國之通義也。

二國財之賦於民而爲稅者。

案斯密氏之言稅也。總論而外。分四支言之。一曰稅於租者。二曰稅於贏者。三曰稅於庸者。四曰雜稅。而總論之中。則先舉賦稅四例。蓋自有論稅以來。無如是之

精要而當於人心之公者矣。夫賦稅貢助所以爲國民之公職者其義蓋本於分功民生而有群。徒群不足以相保。於是乎有國家君吏之設。國家君吏者所以治此群也。治人者勢不能以自養。於是乎養於治於人之人。而凡一群所資之公利。若守圉若訟獄若道涂若學校身家之所以保。人道之所以尊。胥匡以生。皆必待財力而後舉。故曰賦稅貢助者國民之公職也。向使民散而不處於群。而人人力足以自衛。智足以守其所應有。則勢且無俟於國家。而一切督奸禦侮之吏。明刑司直之官。皆可以不設。推其極也。家自爲政。人自爲保。雖無國家君吏之設。可也。雖生而不群。可也。顧其勢不能。於是以分功之公理以保群。治群之職委之國家。而公出其所費。於是勞心勞力之功以分。而君子小人之職以異。何則。功分而費名職異而事精。必如是而後生遂群和也。故惟國家君吏有治衆馭兵之權。亦惟國家君吏有資稅發役之政。外此則殘賊也。而世人狃於其事。忽於其理。至乃謂天子爲玉食萬方。而黎民爲食毛踐土。則見其然而不知其所以然。異乎孟子之

言而暴君汚吏無藝之賦所由滋也

部甲言之悉矣。凡民之財貨要其終皆出於三物。曰租曰稅曰庸。故國家之賦稅亦必三物焉。是出或取其一或兼其二或兼其三。今吾之論稅也將以此爲次。首論稅之出於田租者。次言稅之出於贏利者。三言稅之出於力庸者。四言稅之雜出於三者之間而匪所專擇者。故本篇次段言國費之賦於民者其言自分爲四節。而五三之中又自析爲諸目。蓋賦稅之事有上之所期在此而及其行之也出財者乃轉而在彼此非遞析而詳辨之不能見也。

顧未論各種專稅之先有所謂賦稅四例者其理實行於諸稅之中非先明辨則稅之當否利病匪所折中請先言四例。

一曰平賦因民力。凡民出賦以供國用其上加征之時必求與諸色民出賦之能有比例。夫有比例誠難然征者不可不以此爲正鵠也。蓋民有能否之差而所生之財以異能優者所生財多能劣者所生財寡多寡之財皆爲國家之所保而後有以享



之今其賦之也亦以是爲之差是故蒙保深者出多賦蒙保淺者出少賦至公之道也賦用此例者謂之平違此例者謂之不平願賦於民矣而於租庸鹽三者或取或否則以言平難矣此亦制賦者所無可如何者也故此篇之論諸賦也凡如是不公平則言盡於此而不復論論者獨賦行於一物之中而猶有不平之弊者此固欲無指摘而不能者矣

案羅哲斯曰斯密氏國稅四例已爲後此言賦者玉律金科國家創一新賦必於是四者察當否利弊矣雖然其例未嘗無可議也如此例云凡賦必視民力驟聞其言若理之公且明莫若此者雖然設精以析之則斯密所謂力者果何解乎力爲任賦之能歟則人將謂斯密氏之旨謂賦以產業之多寡爲差此昔者差級稅所行之而弊滋者也將以力爲享用之等歟則守財之虜宜先免稅何則彼未嘗以財奉其生其享用固最殺也抑將謂賦者以所受之保護多少爲差如斯密氏之自解而以爲最公者則婦人孺子國家之懷保最深仁政之行當先焉

獨婦孺當深賦之耶。必不然矣。故此例力之一言。已不知何解。違言平乎。竊以謂欲通斯密氏所標之四例。必先明賦所從出。必有其餘之一例。而後可。蓋財之所生。皆緣民力。其所否者。獨租而已。租者其事起於土壤有限。而民占爲產。至戶口降滋。耕者出穀。其得價取酬。力庸與原母之贏利而有餘也。且生財以力矣。則力必有所養。而後財生。向使無以養力役者。則力役事窮。而財源以絕。故欲財生。必不宜於母財而加之賦稅。加賦稅於母財者。無異司汽機者欲汽力之長。而奪其薪炭也。故一言蔽之。稅必在於價之過經者矣。過經者有餘之謂也。然則不獨養民之財。不可以賦。即教民之財。賦之於國。亦大損也。文明之運。日隆。商工之事。大抵皆待學。而後能之。故教養小民之費。無異乎用之於浚田。治剛造機械。而飼馬牛也。其不可稅之使減明矣。教養而外。又有所以贍疾病待羸老之資。民不能常勞力也。使一旦以筋力衰。其勢即鄰於溝壑。仁政所必不出也。故力役受庸。有三宜復。而必不可賦者焉。一曰所以食其功者。二曰所以復其學。爲是業之費者。三

曰所以資其羸病衰老者。庸去是三而外。是謂有餘。有餘而取之於民生爲無傷。分言之者也。亦於國財爲不耗。合言之者也。是有餘者。則斯密氏第一例之所謂力也。故曰必達賦在有餘之例。而後賦因民力之例可以言也。使上之賦民。違乎吾所言之例。將其賦爲苛爲不公。往者穆勒思之而不達。則謂民所積貯蓋藏。不可以賦矣。理嘉圖言之而不盡。則謂民之母財。不可以賦矣。不知蓋藏不賦。國將取何者而賦之。而國所不取。固皆可以爲母財。母財不賦。是終無可賦也。二家皆不達於賦在有餘之義。故云爾。

二曰信。賦必以信。信於時。信於多寡。信於疏數。上既定一賦之令矣。國之民所必供而不可以免。使取之不以信。斯大亂之道也。納於何地。收以何人。輸賦之月日。征收計量之何若。出財之多寡。必昭昭揭諸國門。使國之人共知之。設其不然。則出賦之民。必爲催科索賦者之所捉撈。操持所喜者便之。所惡者大不便之。不便之可畏。則胥吏之囊橐肥矣。故賦不信者。其吏必汙。其民必病。欲不汙不病。不可得也。信以賦

民國家所不可不謹守而力行之者也。吾嘗觀有國者之賦政，知不平民猶可忍也。至於無信其民，未有能忍之者矣。

三曰便賦。必使民徵收之時，輸納之法，皆當以最便於出賦之民爲新猷。故田租之賦，宜徵於登場納稼之時；屋租之賦，宜收於賃者納僦之頃。如是則事豫而民之從賦也輕，大抵饒而非需之貨，國家賦之，則出賦必銷用此貨者，其稅陰行於物價之中，於彼既無所不便，且購物之時，即納稅之頃，購之與否，一出於民之自由，便是稅而猶有不便，則民之過而非征者之失矣。

案耶方斯尙有稅子不稅母，稅熟不稅生二例，此皆可駭於斯密氏第三例者也。四曰覈賦。必覈實國之所收，與民之所出，必使相等，不中之賦，往往民之所出者多，而國之所收者寡，其致此之弊，厥有四端：設爲局署，吏役衆多，所收之賦，大半爲其祿廩，或正賦之外，巧立名目，以爲侵漁之地，一也；賦設而民視一業爲畏途，由是而是業所養之小民，皆轉而爲遊手，且以取民之無藝也，民往往以畏賦而浪費，自毀

其積儲積儲既亡而國賦乃無從出二也賦行則必立逃隱之罰科條煩苛民舉手觸禁往往緣見罰而破其家遂使小民仰其母財爲生者從此無所託庇且厚征誨匿猶治容之誨淫湯藏之誨盜也故賦愈重則偷漏之姦利愈豐上既制爲重賦以誘之矣乃又制爲嚴刑以待見誘所謂懸法誘民使人陷阱三也夫民各有私而經營之家彌甚責稅之司催科之吏挾公家之勢乃時時取民幽隱暴之廣延稠衆之中此於上固無所益也而於民有大損且其損有時過於糜財苟有其術莫不求免而官之徒隸遂持此以爲訛索擇噬之資四也統此四端皆制賦不覈之大弊黎民重困而於國家財賦不加毫毛蓋其害不僅中飽已也

右國稅四例察其理則甚顯課其用則甚宏故理財言計之家自非病狂莫不極慮留神求與暗合也彼乃用其學識之所至取前事爲之師制爲征科使富者出多而貧者出少至於征收之時完納之路亦未嘗不求信求便於出賦之民也以云覈實彼亦焦然力杜中飽使出賦者於正課之外無所復加而其財將悉用以濟國矣順

吾今試取古今諸國之賦列而勘之。將見法有所窮。意有所忽。識有所不至。患有所不祛。求其悉合於前四例者。蓋絕無而僅有也。

甲論賦之征於租者。

以下言賦取於田。以租爲比例者。

田租之稅。其徵收之術有二。或沿舊令。分地爲區。町圖甲之類。而區有定額。比例徵稅。此不變者也。或依每歲之納租多寡。穀價貴賤爲上下。且地闢田美則征多。農廢田蕪則征少。此隨時爲變者也。

如吾英地稅。其徵收則用前術。每鄉田畝。皆依令甲比例估租。其始估者。固與真租相若。行之久遠。勢乃懸殊。農業脩進。其估日以見少。田疇荒棄。其估日以見多。考地稅之征。行於威廉馬理亞之四載。其時所估各噶溫提田租。已非翔實。不可謂平。故以四例繩之。於第一例已不合矣。然於其餘三例。則無可議者。其行令甚信。其完納有定時。皆在佃者秋成輸租之頃。則於民便也。賦雖完以田主。而農佃實供之。彼於

授田名租之時固已豫爲之地以較他賦其所設司賦之吏胥爲寡則亦未嘗不覈獨其賦額一成無變故雖田治母增農主交利而於上爲無異所稅既輕不足以沮農民之加母秋收之實降而愈優秋收既優則地產之值亦無由以益貴於勞力之民無損焉然則此賦之累民止於供稅以時而已此固末由解免者也

大不列顛稅畝之政其信便而覈如此有田之家獲其利益然此實丁天時人事之相資不期而得此非制賦者之始願也蓋自威廉馬理亞履畝定賦以來大不列顛之田莫不降而彌茂田租所得歲以益多今所實收之租與古所名估之租既以大異則所征於租者自日形其輕寡也向使天時不齊抑人事不臧而田收降劣則今之所謂差較而利歸田主者不可見矣故估額不隨世爲盈虛不必於下爲益於上爲損田主得失之數亦相半耳假令百餘年來田事異此雖田主損而君上益可也豈有常哉

且國稅皆以泉幣徵而估田科賦亦以幣言履畝定賦以來銀值初無大變即國幣

權色亦無增損。向使銀之本值日騰。如美礦未出之前二百年。則雖賦額不改。田主可以大用。（羅哲斯云十五種銀值無所甚騰。斯密所言稍失考。）又使銀之本值日跌。如美礦既出之後百年。將其事反此。而國賦以之大虧。至於國幣權色不恆。以同稱等重之銀爲之名少。抑爲之名多。如一翁斯銀。原鑄五先令二便士。以造二先令七便士。抑以造十先令四便士。將見前事於出賦之田主有厚損。後事於受賦之國主有大虧。

自此觀之。則知國家定一賦額。以征於民。往往以事勢不同。至於困民病國。況群之爲物。無歷久不變之理。人有盡之物也。故以人力以造國家。設不爲窮變通久之方。則其物亦必有時而盡。故凡爲群制政。欲其可久。不宜爲一切徇時之計。必使情勢雖異。而其制弊無不宜。庶不貽後人以積重難改。積弊難行之憂。此則道國者事事宜然。制賦一端。特其尤重者耳。

田租之稅。設與租之多寡有比例。又與田之治否爲升降。則稅之至平者莫此若。此



法國計學家之議論也。彼蓋謂國財究竟皆出於地。則諸稅究竟必皆出於地租。與其從末流而支節賦之。何若就其本源而籠統賦之。之爲得乎。且從本源爲賦。賦未有不平者也。其論如此。雖然。自我觀之。則彼謂賦於本源者。未有不平。是誠篤論。顧田租之稅。果爲賦之本源與否。則未易言也。今無取故爲精深微妙之論。以求其說必伸。但試取國中諸賦而覆之。則何稅究竟果出地租。與夫有稅不以地租爲本。然易明。而群喙之爭。庶幾息矣。

案法國學者之論。即中國一條鞭法也。然其論有不盡然者。使就一國而言。則賦加於進口諸貨者。於其地租固無涉也。且使外來之貨。與本產同物。賦者免本產而獨征外來。則其勢將使本產者增價以入市。又賦加於出口諸貨。而不掣還者。其所征之稅。亦與其地租無涉。若必以法計學家之說爲不可攻。而謂賦所由來。原於畝畝。則由田而征。所費最省。欲求合於斯密氏所立之第四例。國家誠何取於舍輕就重。舍易就難。而一國度支。不於登塲納稅時。而徑賦之。必瑣瑣焉立爲

諸種之稅政乎。今試使英法諸國計國中歲用罷一切之賦而悉取於租。設所言果信。彼有田之家必能展轉取盈。令彼歲入與前相埒。設其不能。則謂諸稅終出於租者。不待攻破矣。此所謂以矛陷盾者也。

溫匿斯國中可耕之地。主者皆以均授農。而國賦則什租之一而征之。凡田約其部省皆有簿錄。而守之以司稅之官吏。設田主自耕其地。則官爲平估其租。而於應納之賦五得減一。故以田授人。則百賦十。以田自耕。則百賦八。

如是田稅其法實較英倫之地稅爲平。然不若英稅法之恆而信。其估稅往往於田主多煩費。即其征收之費亦若較英稅征收所費爲多。則其賦亦非甚嚴矣。

願求其信。而令征收費省者。亦未嘗無術也。假令官責田主農佃約者。必錄於公。其匿與錄不以實者。有罰。所罰之錢。告者與證者均分之。如此則主佃不敢相阿爲欺隱。以侵國帑矣。且如此則主與耕者爲約之情皆可得。

或田進或穀貴。易約改佃之頃。有加租。然以避賦也。田主常受賄於農。承舊約而租

無所加此術於豪子最便彼甯收厚賄於今而不恤薄租於後也第租薄則有田者實受其負且有時於佃者亦損而於公亦常損而無所利也何則農竭力以出厚賄其資耕之母財坐減往往出薄租難轉不若山厚租之易也故如是則耕劣耕劣而田實不進者通國俱損之事也必祛其弊則爲法使賦其賄倍於常租如此則民性失利而違其術越其術則君國大利不僅主佃之無所損也

尙有立約受田矣其約中載明耕者當用何法歷年應輪種何穀凡爲此者皆緣田主自謂於田事甚精過於佃者就課其實殊不然也而佃者爲約所束縛不得爲所欲爲其效直無異於加利蓋加租者加於財也約耕法者加於事也而有損於佃者則同欲祛其弊宜爲法使賦於此等之租倍於常約庶此俗可易則於田事深有裨益也

田主取租於佃不盡皆徵以銀有任土取物者如穀麥牛羊鴨雞油酒之屬粒雜成租更有徵其力役者此皆古法順即今行之於田主爲益常少於農佃所損恆多蓋

於田主所收之外常多浮費也。國如是徵租者其農皆困苦貧窶租愈重則其農愈貧。欲祛其弊亦宜以法賦於此等之租。過徵銀者庶田主以失利而更張之亦農民之大利也。

田主區所有之地以自耕則宜集近鄉田主佃農使公估其租額以定賦所納之賦宜仿溫暱斯成法酌量作減以勸麻之。但自耕之田宜有定額不得過廣耳。蓋田主自耕其地常爲田業之益國家所宜獎者。王者常雄於財雖於田功稍拙而食報常豐且母厚則能試新法而其情又樂爲導倡用新法試而不善於彼所失蓋微試之而善則通國之利也。雖然勸以減賦何自耕矣。而於田又宜有畛域而不過假使豪富之民盡以其田自耕而不畀之勤苦儉嗇之佃者將舉國皆惰農治地鹵莽而歲殖以耗此不僅王者之失利也一群之利緣此而損國將貧矣。

以是術行之則田賦無不恆常變之弊夫不恆常變者出賦之民之所大畏也。且果使行之而善豈徒免不恆常變之弊而已治地之政將由此而益休耕稼之方亦由

此而益講。凡此皆主賦之吏所可以計致之者也。

國家裒集地賦。凡租升降而賦與之俱者。其所費自校一估而勒爲定額者。蓋隨地皆有稅司簿錄之煩。估量之密。凡此皆非無費所能爲也。雖然。使得其術。則其費可使不奢。而以較他稅所需之費。常省。且地賦者。國家財用之大原。他賦比之。茫然遠矣。

夫謂稅隨租長。故有田者不樂濬治其田。此甚似之說。而議者所據以右定額之制者也。地之闢也。官不出毫毛之費。乃從之而增其賦。民情之所不願者也。雖然。國家欲有以酬濬田蕘畝之民。亦非無術。今使民於加母蕘培之初。集司賦之吏與夫四鄰之田主農佃。公估其田之值。然後按其所值。定若干年。許復其稅。以酬其治地之勞費。則有田者亦未必不樂爲也。蓋隨租升降之地稅。其所以爲善政者。以君上由此常留意農政。而樂於國田治闢耳。故以勸君上。則所定復稅之年限。不宜過久。恐以利遠。不足以概食租衣稅之心。而置浚墾田疇爲何有何亡之數。雖然。使執兩端。

而衡之與其爲期過近又不若立限之稍遠也蓋孤田主出財治地之心者其害過於君上之膜視彼君上雖留意農政而樂國土之治闢然勢高則不切意廣則不精其於一國之田其肥瘠相關之情終淺若夫田固田主之田也身之衣食視此子姓之休戚視此則無怪寸寸而籌之稔稔而較之矣是故仁君惠長之於其國也務盡其力使田主耕農日求其田之肥美然而其道無他任民自由使各用其智力之所及而無所沮撓守衛境宇鋤絕侵欺使各享其勤劬所收之利實而無所憂虞又爲廣通市場使得懋遷有無匪所祗滯故水漕陸輓道里通達河渠利安民之由之也費輕而事穩且交通萬國使無往而不自由懷保之周徧乎宇內夫如是而其國之田產不歲饒國中之地猶或荒棄者未之有也

案羅哲斯曰謂稅隨租長而民不樂治田此甚儉之理也且其事宜分別言之夫田疇加腴由於耕者之巧力則租增稅長非農人之所畏也若其加腴之故必藉母財之克增而所增之母加諸地而不復收如是而租增稅長者亦視稅則之何

如設其輕簡公平。農者亦不緣是而裹足也。此如吾英之政。民營一屋而貧算以興。願以財治田。事正異此。吾未聞人以其國算繕之故。而不敢積財。則農何獨以田稅之增。而遂沮其向往乎。殆不然矣。

又案中國近世士大夫。亦聞國之財賦原本於農之說矣。言變政者。有唯否。獨至興農治地之業。則舉國若一人無異議者。彼見各省荒地之多。遊手之衆。則未嘗不大聲疾呼。以移民實地爲救貧上策。此其議固然。顧吾獨恨其明於此而闇於彼。有見於果而無見於因也。夫地之荒也。必有其所以荒之故。民之貧也。必有其所以貧之由。不然。則求利之事。彼豈待勸而後知爲之耶。惟其爲而無利。故智盡能索。委而去耳。議者知務農矣。而又爲閉關鎖國之說。又於一切電報錢軌通商之事。皆深惡而痛絕之。不知使貨出於地。而莫與爲通。雖國家今籌甚鉅之款。以備車牛。惜子種。置屋廬於民。民今爲之。不二三稔。其委之而去。又自若也。嗟乎。理財之道。通之一言。足以蔽之矣。今之憂貧者。日求國富。而惡爲其通。此何異幣

者日進填補之劑而塞病人之二洩如是而不殺人未之有也烏在其能肥乎使國家之治田賦也能爲之法焉不僅於出財培田之民無所於沮也且有以勸獎之則田賦誠爲最公最善之賦爲有國者所必資而於民無不便

田賦善者無論其國家流變之如何國中農業之脩廢銀本值易權之大小泉弊權色之重輕精監無待朝廷君吏之更張自有以與其時勢相合世變雖異而其法之公且善自如如是則其法可垂爲常制而爲國家財用之源以比他宗之稅權必當時爲估而後徵收者其於國家繁簡常暫之情異矣

向之所言者上之所稽止於簿錄田約而已或以是爲太略則清丈測量之說出而重爲其國煩費爲此者其意蓋謂約者兩曹或朋比以誑誤國家逃匿正賦耳此如陀穆斯抵書則測量通國之田而著之圖冊者也

普魯士王於其舊畿之田皆實測詳估而後升科且隨時覈勘加更張焉其制民田於歲值百征二十或百征二十五爲率教會之田百征四十或四十五息勒細亞部



新以王令通測清估。號最翔實。如其制。獨比烈斯老畢協之田。計歲租百征二十五。餘兩宗教會田。皆百征五十。其圖頓種人及摩洛他官長。則百四十。其餘山大抵紳貴之產。則百征三十八又三分之一。賤庶之產。則百征三十五又三分之一也。

聞布希美亞國測田估稅之事。治者過百年。逮一千七百四十八年。以今王后之詔。始告成功。米蘭公國測地之政。始於察理第六。至一千七百六十年未竟。論者以爲最審沙衛與比德芒測地之政。發於沙諾尼亞王也。

普魯士王國之制。凡教會之產。徵稅重於常民。蓋謂教會田業。常以累國。從未聞教會徵租。有斥其財以溉田治地者。故教會而富。國之歲殖不以增加。普王所以稅之獨深者。殆職是故。然他國之制。優免教會田賦者有之。酌減常率以爲輕者亦有之。其不同如是。米蘭公國。凡教會田業。置買在一千五百七十五年以前者。其計賦僅取三分之一也。

息勒細亞部。凡貴人之田稅。較庶民田產百率加三。普王意亦謂貴人所享權利。優

於齊民多取之政不爲虐庶賤之苦輕賦所以恤之然他國之制有反此者貴者輕而賤者偏重焉沙諦尼亞王國暨法蘭西諸部其王專稅所出號泰理地者其稅皆偏取於齊民凡紳貴之業皆免之

彼通測總估而後征田稅者其意本謂非如是必不平也然其始雖至平往往行之數年事俗異前則不平輒見爲政者設欲歷久皆平則必委曲煩重凡吹澮之變遷收成之互異莫不察而薄之而後可此爲政者之所難也昔普魯士布希美亞沙諦尼亞諸王國與米蘭公國之政府常有意夫此而盡心力以爲之矣然其勢卒不可以持久縱令能久而其事於出賦之民無益而轉以苦民者有之矣

一千六百六十六年法國孟陀班省以徵泰理王稅書精測而實估之矣乃至一千七百二十七年所估已形參差欲補偏救敝政府舍令通省加賦十二萬利佛外別無良策所加者偏於泰理稅所及之所然賦之所出則僅由短估之田而過估者轉邀補恤之政譬如甲乙二所之田以見收實估甲應稅九百而乙一千一百利佛舊

估皆稅一千。今之加稅皆以一千一百利佛爲計。然所加者僅取諸乙田。而甲則降完九百。故國家雖名加稅。實無所多取於民。加者專以救舊估於今爲過實者。獨所謂短估過估之分。悉由省中長老董其事者之斷決。則果平與否。又不可得而知也。以下言賦取於田。以田之歲收爲比例者。

賦於田之歲收。與賦於田租者。名異而實未嘗異也。雖其始皆農之所供。而其終則皆完以田主。農知所收之一分。將出以爲公賦也。則精心爲計。稔與稔較。而知是一分者於彼。眞值幾何。及與田主議租承田之頃。則謹豫減之以爲約。此常道也。往者教會所征之什一稅。即與歲收比例者也。謂農承田之頃。有不豫計什一稅所值幾何者乎。未之有也。

教會什一稅。洎夫他賦之同。夫此者。驟而視之。若至平之賦。然而實至不平。以地勢人事之不齊。其所取者於歲收之分雖同。而於租有大異。蓋使壤地齊腴。所收豐稔。往往但得其半。已足復農者之母財。而加之以其地通收之贏率。故無教稅。彼力能

以餘半納之田主爲租。自教會取其什一之收。彼之所納爲租者。當減其五之一。不如是不可以復斥。而益之以贏率也。故有教會什一之賦者。田主之租不及歲收之半。而僅及其十之四焉。又使土田瘠确。則其事反此。歲收既儉。耕費愈奢。欲復農母加贏。非十分全收而留其八焉不可。如此則所餘以爲田主之租。已僅十之二矣。顧乃前取其十分一以爲教會之稅。彼勢必取此於租。而減什二者爲什一矣。故什一稅以田租之比例言之。息土所徵。不過什二。每鎊取其四先令也。确土所徵。乃取其半。每鎊取十先令也。

教會什一稅其於租不平如是。故田主爲所沮而不培田。農人爲所沮而不脩業。豈培田於田主費重。而農者脩業亦非廣費不能治也。彼見教會不出角尖之費。坐享其厚利。則人之恆情。有相率廢耳。誰復爲改良而勤苦者。此如舊草。自有教會什一稅以來。其種者固於蘇格蘭數郡之田。至界外幾絕。則以蘇用伯理斯白特教宗。無什一教稅之事。故能專此珍貴染草之利。而歐之餘國不能也。輒近舊草。亦稍裁於

英矣。則以議院新定。以每畝克五先令。代教會諸什一稅之制。故民樂從事。不然。舍蘇部而外。茅蒐之種。終古不施可耳。

大抵什一之賦。在歐洲則教會征之。在亞洲則朝廷征之。其什一者。皆非什一於租。而皆什一於所獲者。支那國用。以什一地賦爲大宗。顧算之至輕。有數省所征。尙不逾三十之一者。可謂薄矣。印度孟加拉未淪於吾英大東公司之先。回教朝廷所取之地稅。大抵五分所收。而取民其一。此額與古埃及所征地賦之額正同。

亞洲地賦立法如此。其君於浚闢田疇。開通水利諸事。頗爲留意。如支那之皇帝。如孟加拉之大蒙古。如埃及之加迪佛。皆於國中道路河渠。精心繕治。務使地產穰通。市場廣遠。農不病而康殖彌豐。歐洲教會。雖取什一之稅於民。然以分而見少。故於農事漠然。雖鄉邑之內。有四通五達之涂。瘠鹵可漚之水。農產之行銷益遠。而其地之牧師神甫。未見由此而得多。則其膜視之也固宜。故如是之賦稅。收之以爲邦用。則利弊尙可相抵。以養教會。則無攸利而徒形不便於民已耳。

地稅之以歲收爲比例者。征所產土物者有之。定爲估折之法。征以泉幣者亦有之。爲一鄉之教士。抑小康中產之家。以田自養。其什一之助。與其田之租。常以分收所產爲宜。蓋爲數甚微。而其田密邇。常爲耳目之所及。至於連阡越陌之家。所居在城。市設用此術。所失必多。耳目難周。物多暴殄。執事之衆。長僞售欺。至於國君。任督稅之臣僕。其所耗虧。比之富民。又倍蓰矣。蓋齊民雖至疏忽。其督責用事之人。常遠過於國君之嚴切者。故一切公賦。卽物爲征。皆叢奸弊。往往取下至多。而納之府庫者。至寡。聞支那之賦。凡號貢獻者。恆多如是。監督官司。皆顧其制之沿而不革。則知任土之賦。其便於奸利。過徵財之賦遠矣。

案中國當斯密氏之世。其傳播於外國者。夫已如是。時至今日。又何如耶。大抵中國賦稅之事。盡於取下至多。而納之府庫者。寡二語。顧其弊尤莫大於漕運。而論者一言折漕。衆難蜂起。則正斯密氏所謂監督官司皆顧其制之沿而不革者矣。地稅以歲收爲比例。而折納泉幣者。其征法有以隨時市價作折者。有畫爲定價。一

如著令每布歇落麥折銀若干。不論征時市易高下者。以前法征者。其賦與歲收多寡有比例。而賦之唯損亦與田之善惡爲差。以後法征者。其賦與所出之多寡無比例。而與三品之易權。國法之精否所名之及實不及實爲差。故前取之賦。以農收之豐嗇爲升降。後取之賦。歷時久遠之後。與農收豐嗇。絕不相謀。

稅於地畝。計所收之幾分。而定爲銀數。以爲常額者。則其事如吾英之地稅是已。其額不與租爲升降。故於培田無所沮亦無所勸也。夫各部之變征。什一稅事亦同此。當蒙古治印度孟加拉時。其所收什五之稅。亦爲變征。而其數甚微。至大東公司轄其地。聲言公賦不及原額。則數部之中。有改變征之制。而稅土物者。然此舉實病農業。自授稅吏以作姦中飽之枋。故自地歸公司。公賦之額。愈不及前。意者改復變征。乃公司胥估之利。而於公司主人。與其地之民庶。則斷斷無所利而徒增費也。以下言賦取於民屋。以賃租爲比例者。

凡屋室之租。可分爲二。其一爲開架之租。其二爲基址之租。開架租者。具母造屋之

贏利也。今有役財以造屋貸人爲業者。欲其事與他業利均。則所收之租必有以爲所斥母財之常息。又必有以爲其屋漸廢之費。漸廢之費者。積若干年而與建造之母等也。故一地屋租之升降。必視其通行財息之大小。使通行舉貸之息爲歲百四。則置地不計。其屋租當歲百六。抑歲百六五矣。又使通行舉貸之息爲歲百五。則置地不計。其屋租當歲百七。抑歲百七五矣。此其大較也。使建造者贏不止此。則役財者競於造屋而利以微。使建造者贏不及此。則造屋者日希而利以進。此又供求例行者矣。

居者出財賃屋。計前利之外。而猶有餘。則所謂基址租矣。使地與屋分主人。此則地主人之所應得也。自賃居者觀之。則出此以獲其地之便美者也。郊野之居。去城市遠。地賤而勢僻。若是者其基址之租。幾於無物。即有之。不過與種植之田租等耳。若夫而郊背郭。城市密邇。有水土之勝。風土之宜。若是者其基址之租。大以欲得者衆故也。是故基址之租。以都會爲最貴。所居之地。爭者日多。而其所以爭者。皆有其



故或便於貿易。或樂於州處。或觀於奢豪。大抵各有所尚。而基址之租以興。

案羅哲斯曰。基址租最大時。莫若邑中可用造屋之地。歸於不數人之手。彼固以是爲辜權也。每見通都大邑之中。貧民所居。湫隘鬱塞。蒙人道之大苦者。皆緣其中地歸辜權之故。至於承地之僧。相約爲聯。則其爲虐滋甚。而國家又以法使承約者。不得過四十年。則室居愈無改良之望。而席門蓬戶之民。益倍仄矣。此吾英都邑中所屢見不一見者也。

今使國徵屋租之稅。令計租爲完。此出稅者。果爲誰乎。一言盡之。屋稅與造之家。必無與也。就令及之。其勢亦不可以久。蓋使造者不獲通行之贏。而有以復其母。則彼將棄其業。由是供少求多。不幾何時。而建造者之贏及率。故曰必無與也。然則稅誰當之。曰地主人與賃居者共當之。

今試設一人焉。自揣能任歲六十鎊之屋租。而其國屋稅於租爲什二。設是人還賃一六十鎊。歲租之屋。總其居室之費。爲歲七十二鎊矣。此過其力所能任者十有二

鎊也如是則降求其次而出歲五十鎊之屋租益以十鎊之稅而居室之費乃適六十鎊爲力所能任者彼緣國稅之故而失其十鎊所得之加美與益安雖然所失者未全失也彼將以有國稅之故歲五十鎊今賃之屋居其美與安必勝於無稅之時所歲出五十鎊之所能得者何以言之蓋有國稅則如前喻凡中求此六十鎊之屋者少此一人之爲競等而下之以有國稅凡中求五十鎊之屋者其爲競亦必減至於凡中求四十三鎊租之屋者其爲競亦減減之至於最下之屋租而無可減則其中於此一項競欲賃者乃益多焉夫競者之減非徒減也其勢將使屋租以微然而微矣將無所損於建造者之間架租損間架租而不能其勢必損於基址之租而後可是故屋租之稅於建造之家無與也必出於賃居之人與夫基址之主賃居者以稅節其居室之便安主地者以稅而減其基址租之所應得此可知者也若夫一稅之收賃居與主地二者各出幾何則不可知者也以吾意言之大抵二家之分方緣外事而有異邂逅之事境既殊雖二家之分大有逕庭可也

是稅之行也。於土地者爲不平。以彼與賃居者之所出或相逕庭之故。而是稅之行。於賃居者不平。則其故不出夫此蓋一人所出之屋租。與其人居養之全費。其相待之率至不齊。而常以貧富之等爲差。大抵高費之戶。此率亦高等而下之。窮簷之民。此率最下。貧人求一飽難。故資生之費常爲大分。脫有所得。則先覓食。而富者所糜。強半皆華侈驕奢之事也。然非先飾所居爲輪奐之美者。則華侈驕奢無所傳。此其居室之費所以常多也。由是觀之。屋租之賦。富者所出最不訾。然則損有餘。副不足。名不平而實至平也。國家有所賦。使富人比例其歲入以從之。最善之政也。即有時而過其比例者。亦未爲甚苛也。

案羅哲斯曰。世常稱屋稅爲天下至平至公之賦。意以謂人之財產。必與其屋租。有比例也。雖然。此言之果信與否。未易決也。夫使擇地而居。一切皆爲民所自主之事。則租視其財之說。固可信也。假使擇居之事。不出自由。而其中屋租地價。又爲宰權者之所持。而自然之例有不行者。則民既病於租矣。又病於稅。豈非重困。

之道設郊野之屋廬其居處之安塗堊之美與在倫敦者埒也而租不及其四之一至夫貧民之居尤相絕工人倫敦所賃之室狹陋極矣而其租與近郊之堅牆廣霑者常相若也租何必與財力有比例哉

屋租與田租若同物也而因果大異田租者以市用地之權用之於生利之物者也田常有所生也屋租者以市居處之安用之於無所生者也其間架基址舉無所生焉田租即出於其地而租屋必以他所所生之財償之故其租之稅必出於他所所生之財或出於庸或出於贏或出於租金三者無從也賃居者之出是賦也於三者不專於一雖然供之與完他日用常物之稅等耳故以常道言之觀民財產之多寡費用之廣狹於他物難見於租屋易知於此而立比例征之其所收或過於他賦第使征之而重民將去高明而就卑狹而費其財於他道耳

欲審屋租之高下而求其近實無難其術與審田租之高下差相若屋之未有居人者宜免賦賦之則屋主以無用無所能生之物而被厚征非平政也造屋自居之

家其出賦當以可得之租爲比例不宜準以造屋之費設準造屋之費而征之將國家但取什一二之賦可以破國中富民世業之家吾英最稱饒富與夫閭閻彫炳之第宅其潤屋飾觀大抵無所惜費使但以百出六七之稅計所費者以爲征則征者與其家所收之實租相若此觀物稍審者所共見也彼皆數世積爲綢繆以有此高明輪奐今日之美然所費雖廣而設令出以售人其可易之財不能若此鉅也

基址有稅其政較閒架之稅爲尤平然基址稅矣屋租不緣此輒增也其稅必有地者之所出而有地之家事同辜權必求極其租之量而後止使其所據爲便地佳境則必有爭而欲得之者而地租之大小視此爭者財力之何如故凡闢地租都會最大爭者衆而各具大力故也爭地者之富不以基址之稅而增則彼之用地亦不願於多山費也夫是稅出居者抑出於地主人固無異也但使居者出稅彌多則其欲地之情彌減而爭之意衰故事勢邊流基址之稅必終出於有地之家而後已若夫屋無居人其基址之不宜出賦則理之易明者矣

案羅哲斯曰。謂基址之稅。雖出居者。其稅極必在地主。(計家謂歸極出稅之民曰稅極。)此說也。吾不能無疑。必其如此。須居者與地主先有成約而後可。而法又未嘗以此許民也。蓋計學公例之行。必任物競之自至。使其爲民俗成憲之所沮。則有行而不盡行者。斯密氏所言。本爲公例。然租之爲物。沿夫民俗爲多。是以不若他貨供求。其例之速而易見也。雖然。基址之稅。天下最公之稅也。地而有租。其事不本於力役。亦非因地主人加費而後租增也。其有而增。原於一國之富庶。地主入方以庶富而收大利矣。乃不出賦。是因群之利而自免於群之費也。可乎哉。按羅所指之稅極。與云民俗成憲可以沮抑公例之行。使之隱而難見。皆計學中要語。學者察之。

基址之租。與夫尋常之地租。皆歲入之無待於勞力役財者也。故雖賦之以助國家之經費。民之生業。必不由是而加沮。一國土壤之所登成。民力之所營繕。凡一群之財力。未出是賦之前。既出是賦之後。有以異乎。無以異也。故基址之租。與夫尋常之

地租民財中之可賦以助國者莫此若矣。

責賦於基址之租實較責賦於尋常田畝之租爲尤宜。蓋田畝之租有時亦以有地者之勞力役財加浚闢而其租以優使責賦過重恐地主培溉之情因之而沮。至夫基址之租其所以過常額者正爲上者政平民康生息理極之效也以國家通商惠工不習閭閻之故身家殷賑之民以多而地之租率以進蓋賃地者之所憤過於地主人之所應得者遠矣而誰之力哉夫其利之進也既由國家之治理而致之矣則使之有所多出以佐佑國家之行斯治理者固天下至公之道也而誰曰不宜。

歐洲諸國於屋租征税者多有之然吾未聞有獨區基址之租而別加以算者意者定賦之人以分析爲難於屋租之中不知幾何爲基址之租幾何爲開架之租也雖然特不爲耳果必爲之吾未見二者之真難析也。

大不列顛屋租之稅其比例之法與用之田租者略同而混而名之曰地稅其算於每鄉每邑一估之後勒爲定額其始固已不平至於今其不平自若通國之內大抵

稅於田租者重。稅於屋租者輕。僅有數部。初算甚大。而後之屋租降賤。則所謂每鎊三四先令之稅。云與其屋租之真實比例相符。不居之屋。雖令所不免。然估稅之吏多優免之。屋與屋論。則以有免者。其算或稍不齊。而總一部言之。則其稅額無所出入也。有時以新造新脩之屋。其租以增。則稅之增減。部自爲政。緣是而屋租之算。愈有高下。

荷蘭之稅屋也。不問所租之多寡。不關居者之有無。比屋估值。而稅百率二五。其算既重如此。而責不居之屋出賦。同於居者。則屬民之政也。荷蘭市息率。不逾百三。今屋稅以百二五徵。加於全值。則其數過於間架租之三分一矣。雖其估稅不平。然常劣真值。屋宅設更造若脩拓。則更估以定賦額焉。

英國定賦者。其稅屋不一術。然皆謂欲定屋居之真租值難。則別用他易知易行之法以爲算。自以爲其事與真屋租有比例也。

由是則爲爐灶。每爐稅二先令。然欲知人家幾爐。更須入入室數之。關稅幽隱。人人



以爲大戚故當察理第一民訛以後國以此爲侵民自由之政罷之。

次是之稅則每屋居者出二先令屋十窗者加賦四先令其二十窗以上出八先令復改云居屋二十窗者出十先令其三十窗以上出二十先令民居戶牖可從外數無入室闕隙之嫌故民視之不若前者爐捐之難忍也。

是稅不久亦罷而專行窗捐然亦經增改今之窗捐（自注云一千七百七十五年首月一令曰凡英倫境內屋各稅三先令外其家不過七窗者每捐二便士遞加至其家有二十五窗以上者每窗捐二先令以爲率其在蘇格蘭境屋各出一先令外窗捐如之）

所惡於若此類之賦者亦以其不平也且不平而害其賦之病於富民淺而病於貧民深邊鄙之室房租十鎊者其窗數或衆於倫敦之租五百鎊者前屋之民雖貧後屋之民雖富而自窗捐行其出財以供國用也貧民重於富民故此類之稅爲反於吾之第一例至以餘三例繩之則可議者尙少也。

爐窗諸捐與夫他類之屋稅其勢皆可使租微蓋居者出租彌多其出租之力強  
順吾英自行窗捐以來凡吾所知之城邑鄉野其中之屋租皆有日貴而無日賤  
此可爲吾英庶富之符驗蓋庶故求屋者日多富故民輕於出租庶富之進之也  
於窗捐之抑之矣然則使無窗捐屋租之騰當不止此無疑義矣

案爐窗諸捐所以爲不善者非以其取民之深也且其弊不止於不平所尤不  
者以其與民養生之道相反故也夫養生有二大事焉曰天光曰空氣故居暗室  
者血不華色處濁土者致疾疫而遘生之術尤貴朝日夕月吐故納新皆此理也  
自爐窗稅行而小民惜費塞其爐則室中之氣不流堵其窗則陽光之入至微國  
家何術不可以賦民而必取其財復斲其生如此耶其行於英至一千八百五十  
一年而始罷其令亦云晚矣

乙論賦之征於贏者

財生於贏可析爲二母財之息一也餘於母財之息之外者二也故欲加賦於贏前

者可賦而後者不可賦。後者所以酬役財者之勞勩。與其危失之數。且其數往往不多。使其無此。則役財者其勢不可以長。故使逕以全贏比例出賦。彼勢必轉而求諸贏率。使之加多。抑取諸財息之中。出之益少。舍二者無他道也。設彼於贏率增多。則所征之賦。雖出於役財之家。而賦之歸宿。乃在二種之民。何以言之。如彼用其財以爲樹畜農牧之資。將於所收之穀麥牛羊。留其多數以自補。如此則區以爲租者必微。租微是賦之歸宿爲田主也。又使彼用其財以爲懋遷製造之資。將於物價騰躍以爲厚利。價騰是賦之歸宿爲銷貨之家也。使彼於贏率無所增多。則必於財息責其全賦。有所齎資。其息皆不逮夫其初。如此則出賦者以財貸人之主也。總之責稅於贏。其勢必有所出。不出於彼。必出於此。使皆不能。則其業廢矣。

案羅哲斯曰。吾聞穆勒言。賦之加於贏利者。其稅極往往即在當時出稅之家。不能由甲而移之乙。能者獨一二業耳。如釀酒之家是也。使斯密氏所言而信。必贏率一事。純爲物競之所定而後可。然而商賈交易之事。物競亦有不盡行者。故價

貴有不必避。價賤有不必趨。而交易各從其所稔信者。如此則賦立之頃。凡前此之得利而僅足以存者。其業必僥。緣此而同業者。希希則留於其業者。利進而其力乃足以供賦。故曰賦出於有餘。吾於此又悟其例之無往而不行也。

至於財息。驟而觀之。若其物之宜賦可賦。與國中之田租。其利爲既酬。勞動計危失。諸費之後之所餘。無二致者。夫賦加於田租。其勢無由令租長也。何則。一田之所收。自復農所斥之母財。而益以通行之贏率。其所實留者。既賦之後。不能多於未賦之先也。然則等而論之。賦加於息利。其勢亦不能致息率之或增。明矣。一國之母財。等於一國之土地。既賦之後。其多寡廣狹。固無異於未賦之初。吾向者常於部甲言之矣。國中通行之贏率。其盈虛優絀。視母財與民業相待之率。而民業爲數。又非財息之稅所能爲增損也。故使母財之數。賦前與賦後無殊。則通行贏率之大小。賦後亦必與賦前相若。然則贏利之中。其以酬勞動計危失者。其數亦將無以異。何則。勞動危失。愈非息利之賦所能更也。夫之數者。既賦之後。既皆無以異於未賦之先矣。則

贏利之中其所區以爲息利而爲母財之主之所應得者亦必常如是而非賦之所能增損明矣故曰財息驟而觀之其宜賦可賦與田租無二致也

雖然有二故焉遂使財息之宜賦異田租一凡田積畝之大小所值之微鉅必不能爲幽隱難察之端而常可以計量至於甚悉而商賈所具以經營之母財恆屬秘而不令人知能測而悉殆未有矣且多寡屢遷不獨以年爲盈虛也且以月日異焉今使以國家之稅於息利也常取其所甚秘之事而評之母財且暮之異賦者必與知之若津吏之朝潮而夕汐者此其煩擾殆非人情之所堪任者矣

案算緡之事其爲病民不待論矣然吾聞美國行業產稅一切聽民自占不設法令以待逃隱然上下廓然無欺匿亦無逆詐可知民德稍進雖至不可行之政皆可以施往往縱任其民而其民轉厚自愛彼任法術者烏足以與此乎

二田之爲物地著不可遷徙而母財之移置至無難也田之主人雖有在邑在野之不同然大抵皆人與田同處於一國至於母財之主全地之民皆可爲之不必專之

於一國一都也。一國稅政其甚經營之事不得自由則移貨他所不受胥吏之詰責誅求事易耳夫行一稅政致一國之母財盡徙則其國之生業掃地蓋耕田力作無往而不藉母財母財既亡其君民乃至交困不獨可征之權利無有也恐租與庸從之則更取何利而賦之乎

然則母財所生之利國家終無術以賦之乎曰有國不得已而賦及母財者則與爲其密甯爲其疏爲其急甯爲其緩主於寬大不苛清靜無擾而任民之自占夫爲此不苛無擾者正所以救其賦之難平而不精民知上之取我者甚微則雖他人之占不以實彼亦無概於其隱爾

英國所征之地稅制者之旨所以征財息者與所以征田租者蓋同如田租之稅每鎊例征四先令是爲五分租之一故原制所加於財息者亦欲五分所收之息而取一焉先是倫敦息率爲歲百六則每百鎊息錢應征二十四先令此爲五分六鎊之一也逮息率減爲歲百五則每百鎊應征二十先令與相降也考地稅之制國家歲

資定額而國中之野與邑分征之以足其數然於野取其大半其所取於邑者則又以征於屋租者爲多故雖賦財息而財用於力田者不賦用以貸國者不賦賦者僅在二三之邑業而算又遠在實用母財之下也故其原估雖至不平而民未嘗病之縣鄙郊廛田宅母財之數皆一估而勒爲定額不更張也況近世以來國之庶富交臻田宅之值既增母財之積益廣所謂不平愈微難見矣又每邑所征既爲定額其數皆可豫知而無無恆漲縮之弊民尤不受其賦之行也總英國之田其舊算不及半值至於母財則舊算五十不及其一也邑居數處如威明斯德其市業母財皆不征征者專於屋宅獨倫敦則與此異耳

夫國家以賦稅之行而執訊民之幽隱此最煩擾最病民故各國成賦莫不謹準之此如罕布爾格民主國中之民法產子者必助國家以二五罕布爾格民大都皆商賈則是稅加於母財者矣每歲納賦之目縣官坐堂皇聽民自占產置諸於隅民自具所應助者投其中而誓曰此某某產子之二五也若有欺吝天神鑒之誓畢而退

官不問其財之多寡亦不驗其所納之實否也然其賦愈以謂不欺蓋民主小邦下任其上群知國有歲用非此不足以立則如保公器皆樂出資就令無良其數必寡此其術固可用誠信不給非無事也矧乎其有帝天之澤耶且此不僅見於罕布爾格之民而已

瑞士之安德武德社常有風泉之災而國之大費以起遇此則民集於公會自占所有以待賦民慷慨自言未嘗稍諱匿也其在丹列社國有所費民亦比例其歲入爲征法皆盟而自占民各相任未聞或疑其鄰之隱匿者若巴塞勒社國用仰於出國之貨稅民會盟自詭每三月完所稅者由是商賈之家各自簿錄其所售至期則其錄與稅獻之主藏無或通欺諸如此倫其賦於民也法至簡易然未聞以信任其民之故其國賦稍有耗虧也

於稠民廣坐之中以盟詛自占其財之實數此在瑞士社民之中爲之甚易而在罕布爾格則爲厲民之政矣何則其民業之情異耳仰機射利之商其治生如用兵然



使時時以其實情宣暴則貨貨皆梗而所爲必敗獨至織書勞苦之民不顧機利則雖以貧富之實告人未嘗病也

近世荷蘭以擁立鄂撈資王之事國計民產各出百二之算其完賦一如罕布爾格而民亦無歎匿者此其事較之罕布爾格爲尤難然而民樂之者則以既廢舊政而樂從新故耳國有大緩急資民一時之力其勢固不可常也當是時荷蘭息率不過百三今乃計全產以百二之算助國此以息利言則稅每鎊十三先令四便士也意其時出財之民至息盡侵母者有之幸其一用而罷故民猶可以自勉設其常用則將使民業掃地雖欲勉必不能矣

如是之稅其法皆稅子而不稅母如吾英之地稅其所算亦息也算財之息與算地之租均租一鎊者稅四先令故息一鎊者亦稅四先令罕布爾格丹列諸賦皆加諸息利者其以母財爲算者獨荷蘭耳故其賦可一試而不可累行也

以下言賦之加於專業之贏者

歐洲諸國賦加於贏有僅在專業而不必凡贏皆賦者其事往往在商賈而加於耕農者亦有之此如吾英之稅責諸叫市街鬻者矣有責諸牽車負囊行賈者矣市之與簫有稅酤麥酒者酤燒酒者皆有專捐而後許入市近歲兵事則城市之店肆皆稅之制賦者曰兵事之所以起者爲保通商也故商賈有扶助儲蓄之責焉雖然彼不悟凡如是之稅名爲責之商賈而實非商賈之所出也物競盛行之世往往商賈之贏既微欲其出稅勢有不可故其終極出此稅者皆銷貨之家商賈先完其征而徐集其散者散者之所集優於先完之數也

使其爲賦也於業之大小有比例則賦必銷貨者之所業出而於治業者無所苛使於業之大小無殊而責從同之稅此亦銷貨之民之所業出而於治大業者利於治小業者疲此如城中每車七日責捐五先令每歲歲責捐十先令二者皆業畜車簫者所先納然於其業之大小略有比例則大小二業無所偏利於其間如酤麥酒者歲完縱容稅二十先令酤燒酒者歲完四十先令酤葡萄酒者歲完八十先令凡此

皆不問所酤之多寡。故售多者利。而售寡者若畸重焉。蓋售多則復其所稅甚易。而售少者較難。故也。雖然。以其稅額甚微之故。雖有畸重。民不知之。且或謂酤酒之業。固宜抑之以稅者也。至店肆之稅。一概不爲此例。則無可如何者耳。設必比例爲之。民轉咸怨。何則。生業之大小。母財之優絀。民所甚秘。而難察者也。向使稅之者多。則業小者廢。而業大者僅存。則彼將爲壟斷而制高價。若此。則不惟不病其業。且以利矣。英國於一千七百五十九年。議行店肆之稅。以有弊罷。繼而有助餉之設。吾歐賦加於贏利者多。而最要者莫若法之泰理稅。其稅加於農人所用之母財。而課其贏利者也。

歐當拂特之世。大抵治國少而亂國多。王之取民也。違其強梗而賦其良弱者。其小侯於通國共主。有事則助之以兵與財。然無常額貢賦。王亦不能強責之也。其時歐之土壤。耕者皆拂特之臣隸。降及中古。稍稍自立。故農民之得地也。或由於王。或由於拂特侯伯。此其先皆奴僕也。如吾英之鈔佃矣。一佃之受田於田主有籍。易佃則

鈔籍與之以爲據故曰鈔佃。一亦有不受田爲產但約若干年耕而納租如是者謂之約佃約佃之得自主過於鈔佃也。拂特之主目租農隸之家降益以富而多自立者則心怯之而樂聽國王之加賦於是乎有泰理之稅始泰理稅之所加必其先之爲王臣隸者是爲眞泰理近世沙薩尼亞王所收地稅如在獵幾突普羅惟因陀非尼不列登尼孟陀班諸省亞庚庚官二舉部。一其民自舉理賦治民諸官故曰舉部。一及他法國縣邑皆此制也他國王之賦其農也不必其始之爲隸佃者亦有之如此雖名泰理與原制異號私家泰理法國諸省稱舉部者皆行此稅泰理眞者不徧及故其稅爲不平等然皆有根據至於私家泰理無擇肥而噬則不平而且無根據矣。今日（一千七百七十五年）法國私家泰理行於二十舉部歲入四十兆一十萬七千二百三十九利佛十六絲泰理之賦無不額歲以不同王置稅司以察諸部豐歉旱潦依以定賦大抵各省各分爲若干舉部全省之歲賦諸舉部視豐歉民力爲實有差然稅司欲第民力高下其勢不能雖極廉公然往往所察不得實省所出賦

第諸部之民力分出之部所出賦第諸鄉之民力分出之鄉所出賦第諸家之民力分出之而出者皆歲歲累省察以稅司部察以率官鄉察以鄉吏可謂細矣然其誤者不然而耳日有所不周傳聞有所誤聽也愛憎之私朋黨之異往往亂之故民出賦者其自任幾何未算之頃未由知也且有時已算矣其所出不止算者蓋使不應稅而稅抑應少稅而多稅其人訴於所司則明歲更估應加賦餘戶取以還之又若應出者力不能出稅吏先之以納於王明歲則加餘戶之賦以償稅吏又若稅吏逃亡則舉者之鄉民共承其餉更募財以納王之稅府其募財常取鄉之富者使先出之明歲乃加通賦以償富者其政之糾繞煩苛如此

凡專業有贏稅賈者皆節其入市之貨使取於價者足償其所先之賦而止或節其治貨之母財使貨少而供劣求焉如是則價騰而賦出如貨者矣獨其賦加農之贏利則農之斥母不可收其爲地有定額而所納之租如之欲善耕其地非母財之足以周事不可使收其母則稅與租二者皆有力不足之勢欲其力足以供稅必求

產多而入市之土物大進故農贏之稅勢不足以救穀賤也穀賤則出稅不在食者而在農矣雖然農之計母以爲贏也其率與他業等耳設不及則農業坐廢故是稅既行之後使農而猶求常贏之率也其勢非節之於租不可稅之進租之退也故是稅加諸佃約未滿之時農受其敝至於更約改佃則田主未有不受削者也

國有私家泰理之稅者其算農也皆約農者所出之母財是故農居是國不敢見其良牛馬而常以飢贏之田畜腐敗之田器爲耕蓋其意畏君上之誅求無已也則僞爲貧乏以視之雖然此非計之得者也彼之所失於耕者較之所匿於稅者相過遠矣雖以農功不精之故穀之入市者寡然而騰於價者亦不足以酬其所失於耕者而田主之租愈以少矣蓋以農功之贏國與農及田主交病推原其故皆泰理之稅職之矣夫如是之賦其勢足以竭國富之大源此予於部丙所前及者矣（見部丙篇二）

北美南部泊西印度所行之頭會以墾田者所畜之黑奴爲算者也辨其賦義實與

賦農者之馬牛同科。然則是亦賦之加於農母者矣。墾田者以一身而兼主佃。謂之佃。則先之完稅者也。謂之主。則終之出稅者也。凡田奴算頭會。歐洲之古國皆行之。至於今。俄羅斯猶如此。以其加諸奴隸也。故常俗謂國有頭會。乃民爲奴虜之標識。雖然。未有爲奴而能出稅者也。故出稅者不關爲何等民。必自主自由之左驗也。而非奴虜之標識也。夫出賦稅。明其人之有國家固也。然必其人之有所有。而必不能身爲他人之所有也。民有財產田宅而後有稅。若奴僕牛馬爲人所有者。又烏能自出稅哉。故頭會之算於人奴者。與平民所出之丁算異。平民自出稅。人奴頭會主者之所出。平民丁算多。臆定與不平。人奴頭會雖不平。然以身爲估。無臆定者。故主人之畜僮虜者。皆前知所出之稅。而平民丁算。估有異同。不可一也。其爲異如此。然以其事之類也。則等而視之矣。

頭會亦名奴算。荷蘭亦用之。家雇奴婢。則出奴算。此與前之頭會異者。頭會行於農者之母財。而奴算則行於人家之歲費。此與用物之有稅等矣。大不列顛家雇一僕

者歲出一幾尼亦此類也。此其稅最苦中人家。蓋歲入二百鎊者。雇一奴可也。而歲進萬鎊者。未必用五十奴也。至於貧民。自無與於此稅。

案羅哲斯曰。奴算使民不用奴。故其所屬在下戶貧民也。且其有損於教化風俗者。下戶非爲奴。則無由與上戶之民爲緣。而不得沾其化導之益。故奴算行。將使民之愚者益愚。

凡賦之加於贏利者。不能使息率因之而變也。賦雖行。息率自若。不及率則貸者不出。然使賦加於贏。而算者之比例特詳。則其賦終出於息利者有之矣。法國二十取一之地賦。其制與英之地稅同。算於田宅母財三者。然其爲比例加謹。則財息受之矣。但於稱貸之息率。則終無所變也。

以下補論田宅母財雜稅。

當產業之守於一主也。無間加賦之久暫。其稅皆取於子而不侵其母。獨至產業易主之際。或由死而生。如父子相傳。或由生而生。如尋常之置產。而國家賦稅行。



於其間所侵者多其本值。是則稅加母財者矣。

死生授受之際。甲乙易主之時。產大者如田宅。皆爲衆著之事。欲久秘不能。故上之賦稅。可即事而征之。若夫財物相推受。資貸買賣。其秘而不宣甚易。上不能即事而征之也。則所以行其賦者有二術焉。一戰之國。憲凡如是之契約。所用之紙素。必經官印而預賦者。違此者其契約不堅。二凡相授受。必錄於官之策。而納應捐之賦。違此者其契約亦不堅。前謂之印稅。後謂之冊捐。印稅冊捐行。則民間田宅財貨相授受者。莫不稅矣。

大不列顛之制。大小印稅也。不以所轉之物值爲差。十八便士之半庫倫之印幣。足以爲至大之約。其所以爲差者。在契約之制有不同也。其最重者。例用羊皮之楮。每番皆有印。價在六鎊以下。凡國王之冊書詔勅。與民以永遠權利。及他法司文件。則用之不計值也。大不列顛有印稅而無冊捐。有者特司冊檢點之費。此僅稍酬當官之勞。而君國未嘗以之爲賦也。

荷蘭印稅與冊捐並行。有視所轉之值爲差者。有不視所轉之值爲差者。凡約據必用印緒。其價自三斯台白（值同便士）至三百弗羅令。三百弗羅令者。等於英幣二十七鎊十先令也。所謂視值爲高下者也。設所轉值貴而用印緒賤者。其產沒官。商賈交易之事。其合同條約。皆有印稅。否者獨諸種叱勒耳。然不以所交易值貴而加。凡鬻田宅抑典質。皆有冊捐。率百二五。船噸徵過兩噸者。亦冊之。船者。水上宅也。他財貨當官發售者。其稅亦值百征二五也。

法蘭西亦印稅與冊捐並行。考印稅冊捐二賦法。於吾歐爲今制作備不及百年。而各國皆用之。爲民上者相師成風。此最神速。大抵取民之財不留餘地已耳。

產業易主。由死之生。其賦爲受產者之所出。以地售人。則售者出賦。蓋售者之情常急。而購者之情常緩。緩者有制價之權。常計賦以爲購。賦之數漸長。則價之數愈消。而售者情急不能待也。則順受之而已矣。故售賣地畝之稅。恆爲屬民之一政也。以新屋售人。有間架而無基址者。其稅則購者當之。蓋造屋爲業。必計常贏。使不及率。

勢必罷業。故完稅雖造屋之人。而出稅必置屋之主也。以舊宅售人者。其情與售地同。售者出賦。城市歲造新屋之多寡。乃供求相劑之一事。使求之數少。不足使得通行之贏率者。屋無新造者矣。而舊宅之在市。其數常主於偶然。不因求而後出也。都會之內市井不齊。而閉僥者衆。則舊宅雖出。而價隨其所能得者。於此而賦之。皆售者之所出也。印稅冊獨行於賣貨之事。其賦必賣者之所出。行於訟獄爭產之事。則訴者完之。而所爭之物值坐減。蓋得產之費既溢。則本產之實值殺矣。

諸項產業易主。而賦行其中。此不徒本產之實值坐減也。其國養功殖貨之母財必損。蓋大抵皆括克民財。以供君吏之侈靡。而使其財在下。則無往不以贍生利之功者也。

且如是之賦皆不平。就令估值爲賦。其不平自若。他可得而估者也。轉之疏數。不可得而估者也。至於並值不估。若近世之印稅冊捐者。其不平乃更甚。雖然不平矣。而無任情重輕之弊。蓋其物明著。欲任情重輕。勢不可也。其賦雖常出於貧乏之家。願

其賦時則甚便。納賦之頃。即民受值之頃。常有財以供之。則雖貧任賦。故曰其時也。且其完納之事亦甚嚴。無漏卮。

其在法國。民不苦印稅。而常苦冊捐。蓋冊捐吏緣爲姦。而民之所出無藝。故法國報紙所訾謗其上者。大都指此。然無藝非此賦不可免之弊也。用此賦而至於無藝。必其詔令教條不爲明晰。遂使責賦胥吏得舞文耳。

官設簿書。錄民間之典質。及一切常住產業權利之遷徙。利民之政也。有此而兩造之家愈相任。其餘大半之賦政。則既有大損於民矣。而於公又無益也。凡不可公然簿錄者。其事皆不宜有。乃吾聞法之爲冊捐也。有所謂秘冊者。是違何道耶。

英國之印稅。有加於博戲。菓子殼色之屬。有加於報紙報編者。此雖印稅。實於稅雜銷用物者同。其稅用者出之。若酒壺。維容單之印稅。雖本旨欲抑酤者之利。而出者則酒徒也。凡此諸稅。以其同爲印稅之故。國家以一司領之。實則名同而實大異。所從出者迥殊。言賦者當能辨之。

丙論賦之征於庸者

部甲前論之矣。勞民之庸。準之以二物。其地需工求備之緩急。一也。衣食生事所必資者之價值。二也。求備之勢。有進境有中立。有退行。則戶口之加庶進境中立退行。應之而民食之優游儉節非薄。亦由此而有殊。取民食之經數。用以知最劣之庸。下此則勞民不至。故當求備之事。與夫糧食之價。無異乎前。而上取其所得之庸而賦之者。則其效無他。庸之率將進。且所進必不止於賦之所加者。此其大經也。假如一地。其求備之事。糧食之價。相爲用。而得十先令爲每七日最下之庸率。國行什二之賦於此。則奈何。曰。使求備之緩急。糧食之貴賤。無異乎初。此十先令者。既爲最下之率矣。則今出賦之外。其必得十先令於七日之中。猶自若也。如是則以賦之故。其庸必增。增者不僅七日而十二也。將七日而十二先令六便士焉。蓋欲償賦之外。猶餘其十。則所增者不止五而一也。將四而一焉。無論賦與庸爲任何率。彼之增者。將必較賦者之率略多。設爲什一。彼且八一。設爲五一。彼且四一。常如是也。

故國取勞民之庸而徑賦之。名爲其庸。非其庸也。必有代備出此賦者。且必有代備完此賦者。完且非彼。況終出乎。設其備爲工備。而業製造。則代完此賦者。廠主人也。然而廠主人不出是賦也。必商之行貨者出之。商亦不出此賦也。必銷貨之諸民出之。設其備爲農備。而業耕牧。則代完此賦者。農主人也。然而農主人不出是賦也。彼之斥母。贏者必及常率。否則業廢。故完賦之後。留其地產。必加夫前。而所納之租必少。然則出賦者田主人也。故賦加於庸。其勢必使熟貨之價增。而生貨之租寡。其增與寡之數。且過於賦之所已取者。何則。計贏息故也。

有時賦加於庸。而庸率不進。此無他。求備者日以少也。發業勸功之積畜日耗。地之所登。民之所殖。漸稀。故其效如此。雖然。國如是者。其庸雖廉。而功則實貴也。貴則必有所損。所損之實。亦田主與銷貨之民當之。

賦加於田庸。而生貨不以之貴者。其理猶前者加賦於農之贏利也。故其效止於損租。而不足以騰穀價。

然則賦之不道而害國者莫若征之於庸者矣。然而用之者不一國也。若法國之泰理有加諸雜作者矣。其歲入不得過定數。每日之庸率有定限。每歲力作不得逾二百日。其歲征之額歲與歲異。而其地之司董畫之。布希美亞於一千七百四十八年更張財政。而後大加賦於執工之民。分工民爲四等。上者歲出百佛羅令。抵英金九鎊七先令六便士。次七十。又次五十。最下二十五佛羅令也。

部甲又言。凡文人之業。與夫獨擅慧巧之技。其得精取酬。必與常技之工有一定之比例。今設取而賦之。其精與酬之所進。必過於賦之所加。蓋使非然。則其業將廢而莫之操者。莫之操而供劣於求。而後有以養其業也。

若夫在官之役。與操業以售者殊科。操業以售者。其在市任物競之自然。故必得其平而後止。在官之役。有所託庇。故所得者常過於平。惟其過平。故雖賦不病。且其人以所處之崇優。常爲一國之具瞻。而失職者之所嫉妬也。故上雖賦之而過。國之人恆以爲宜。英國往所謂地稅者。於一切田宅財貨。皆定什二之率。而獨於歲俸過百

鑄之在官者。每鑄之依賦五先令六便士焉。而王室少子海陸諸軍之員弁。泊他官勞勩獨著者。則優免之。而國人大悅。舍是而外。英國無征於庸率之稅也。

案國家之賦其民。非爲私也。亦以取之於民者。還爲其民而已。故賦無厚薄。惟其宜。就令不征一錢。而徒任國事之廢弛。庶績之墮類。民亦安用此儉國乎。且民非畏重賦也。薄而力所不勝。雖薄猶重也。故國之所急在爲其民開利源。而使之勝重賦。勝重賦奈何。曰是不越賦出有餘一例已耳。即如庸稅。固斯密氏所指爲不道而厲民者矣。又證其賦不出於勞民。而爲田主與銷貨之家之所共出矣。然此必庸率之至微。而僅足資生而後信耳。使庸率至優。則雖勞力之家。勢亦不能無所出。而不必盡出於田主與銷貨之家也。故合而論之。可立爲例。曰稅極恆在有餘之家。

### 丁論雜賦

雜賦者何。不專主於租庸庸三物之一而賦之也。此如丁口稅。至於貨物之征。如鹽



酒諸權是矣。民之完是賦也。其財於租庸廩三者不專於一物。出於田租可也。出於力庸可也。出於母財之贏利可也。故曰雜賦。

雜賦首丁口之稅。使國家欲於民之財力比例而取之。則未有不任情爲高下者。蓋一人之財。其多寡可且暮異。欲得其情。則不勝其擾。故當其歲爲取也。不能不憑有司之臆斷也。如此則高下重輕無憑。而有司之喜愠愛憎爲用。其不爲賦之至無定者寡矣。

丁口之稅。欲準民之貧富既難。則設爲貴賤之等。如此其無定雖去。而不平方輿。何則。天下固有貴賤同等之家。而貧富相踰無算者。

故是稅之行也。欲其平則無定。欲其有定。轉至不平。無間所取之重輕。無定不平二者皆弊。而無定之厲民尤深。蓋使其稅輕微。雖不平猶可忍也。重而不平。民末有不騷然者矣。

當吾英威廉第三之爲丁口稅也。其成賦大抵以民等高下爲差。如獨克（見前）

馬基（二等爵）爾勒（三等爵）懷康（四等爵）巴倫（五等爵）挨士科爾（庶長）真特爾門（貴人）及世家之長子少子至於開肆坐列之民家產逾三百鎊者所出賦同不問相越之逕庭否也其貴賤之差即其貧富之等故有前稅以家資算者其後稅以民等算矣如伍長律師其始也每鎊之歲入出三先令其後則入真特爾門之等而賦之矣蓋以爲所賦誠微則雖甚不平究不若無定之難忍也自本朝初年法國行丁口稅至今國中上戶之民所出皆有定額下戶之民則每歲爲估王朝諸官法司將軍皆入上戶之民而算之法國之民意亦謂使所賦誠輕則雖不平可忍而有司之意爲重輕則難耐者然而彼既爲下戶之民矣勢惟有馴然聽上之指揮已耳尙何辭乎

英與法二國之民氣異者賦稅官盡定額責之於民在英不必得也在法則所定輒得蓋英之國家政主和緩而民權較伸當其估行丁口之稅也有得斯足其有不能出賦抑不願出賦官未嘗必強之也法之國家政主嚴切而民權衰微故凡一省一

部之定額有司必取盈而後可設有一二部省以所定之額爲太多則於來歲減算減者如所浮之數至已定之額不可不完有司期於足額其估一部之額也往往先爲溢額而待其力不足供賦者至一千七百六十五年定額之柄王之主藏收之先是則憑有司之臆斷已耳且其爲征也有齎勳貴之家常出其至少而前所謂泰理稅所及之下戶則出其最重者而民乃重困矣

丁口之稅施諸貧窶下戶之民大抵皆賦於庸凡賦政之所不便者此實兼之雖然其賦之行其費甚少故所賦爲艱且使以嚴峻求之則國家歲有可指之實供以是之故凡國之不甚以民瘼爲意者常喜行之然其賦於小國則足用於大國則爲賦入之小支縱其所得至多苟爲改制皆可以他道求之不必以此苦民而以國家爲怨府也

丁口諸稅而外則莫重於貨物之權然貨物之所以有權者正以丁口稅之難行故也國家欲取民之歲入而賦之又常患無術以爲其平則轉而賦其費用貨物者固

下民費用之所存也。言賦者以費用爲與民財有比例。故罷丁口稅而爲貨物之權。是固賦民者之所以爲平也。

貨物皆民之所用。而有需有饒。吾所謂需者。不僅小民生事必需之端已也。固亦有生事必需而外。風氣所成。雖終窶之民。以無爲恥。必不可乏者。此如白晝之袿。得者不必生。失者不必死。往者希臘羅馬之民。居養甚舒。未嘗必衣白晝也。至於今則歐洲諸國之民。雖爲貧傭。無者至不比人數。蓋其人必無行義之尤。夫而後一寒至於此極也。他若革鞢。亦風俗所謂不可少之端者也。無論男女二民。苟自好者。皆以無此爲大詬。至蘇格蘭則革鞢一物。丈夫不可以乏。而女子雖徒跣無妨。法蘭西丈夫女子。皆可無鞢。而俗不以爲病。此則風氣所動。忽然而成。有欲索其解而不可得者矣。故吾所謂需者。不僅需於天者也。亦有需於人者。需於天者。失之則死亡疾病者也。需於人者。有之而後比於人數者也。舍此以往。皆可謂饒。饒不必侈靡之謂也。一壺之酒。一斗之菸。凡屬生人。皆可享受。不必遂過。然既不需於天。又不需於人。失之

既不必死亦不至不比於人數則真饒耳需與饒之辨於吾學如此

隨地庸率不同而其所以不同之故一緣求儲之緩急一緣生事所需之貴賤故凡能使衣食價高者亦能致庸率日大也儲市有進境有中立有退行儲者生事之舒促視之而庸率亦從之而異（詳部甲篇八）今使賦加於物貨之需者則其市價必騰騰之數不止於賦之數也必賦之外加贏息焉而後可故如是之賦其效有以使庸率之增增者與需物之價所騰者爲比例

故賦需物其效無異於賦庸勞力之民雖若出財而轉瞬之間且必有代完之者誰爲完之雇是傭者之多所虞是已使雇者爲雇主人彼將於所成之物增其價價如所完之賦加贏以爲售夫如是則出賦固銷貨之衆民也又使雇者爲農主人則所完之賦加贏彼將取之於其租夫如是則出賦者固食租之田主也

案羅哲斯曰試爲譬之今使加賦加於麥麥於吾國傭者所待以出力者也如此其賦極爲誰乎使傭者之所得優於所待以爲生者將傭即賦極匪異人任也如

是則諸備用物之權以衰而回售於物者緣之而利減此其情凡出賦者之所同也。使備人之所前得。俾然僅足以資生。則是賦先被諸雇主。雇主不任稅極。乃爲銷貨之家。若諸物悉騰。百工皆病。則賦極又在得贏者矣。此爲製造之工言也。又使田功大貴。生穀以費。田主固常受損於租。然農主人見田功之貴也。彼將爲機耕以救之。機耕行則後之稅極不必食租之田主也。

至於賦加所饒則不然。此不僅豪家富室之所用也。貧窶所用亦爲饒者。其價之騰躍也。於勞力者之庸率不致增也。此如菸稅。菸貧富之所同用也。然於庸無所異。菸之稅亦重矣。英之稅三倍其原值。法之稅十五倍其原值。其征之重如此。他若茶。舜。錫。饌。皆此物也。茶。英與荷蘭。雖下戶之民猶用之。猶西班牙之用。勺古力矣。大不列顛於近百年之內。所加征於火酒者。名稱繁多。然未聞庸率緣之而加大。又若波打酒。以麥酒每筭加賦三先令之故。價以陡增。而倫敦之工。價仍舊。舊率日十八便士。至二十便士。而今仍此數也。可以見矣。

蓋饒物價長。勞民贖家育子之費。不以遂煩。其在謹儉之民。是稅之行也。其效與古者君上取民日用而立之度數正同。彼之前用之也。既蓄自其稅行。則相率遠之而已。故其贖家育子之能。未嘗緣是而遂劣。抑且以此而加優。謹儉勤苦之民。孳生最廣。而生利之功。資以無貲焉。雖然。民之謹儉勤苦者。亦僅耳。彼獨無放恣貪饕者乎。饒物雖貴。奢之如初。遂空其財。不顧室家之養者。有之矣。顧如是之民。其孳長難。雖有生者。往往爲寒飢之所耘鋤。就令得天獨厚。經凍餒之災。而不即死。然以父母放蕩。蒙養先非。即幸長成。於國無補。而轉以累其群者。比比矣。故國家取饒物而賦之。雖於不節之小民。有大罰。使之難於長養其子孫。然如此之民。於其群固無愛。而謹節之民。則不緣此賦而耗損也。

案法國計家拓爾古齊深駁稅饒不損民生之說。

反是而觀。知需物之價長。而庸率不比例而進者。其勞民之生齒。必以日微。勞民之生齒日微。則其國生利之功爲之寡。無閒需功之業在其國者。爲進境爲中立爲退。

行也。

饒物之賦也。其效止於本物價騰而已。需物之賦。其效乃使工庸日增。工庸增矣。則凡熟貨之價。舉貴價貴。則中求者稀。饒物之賦。賦出於用物之家。賦之由來。於租庸。贏不專一物。需物之賦。賦出於田主。則賦之由來。在租。賦出於富民。其所由來。於三者。亦不專一物。至於其後之所取價。則皆大於前之所出者。何則。計時必責贏利。故也。使其取價於熟貨之價。而是熟貨者。又爲貧戶之所必需。則庸率又以長。故使國中貴富之家。知自計其利實。則凡工庸之賦。與凡加於生事必需之物者。彼必力沮之矣。知其賦將終出於其曹。而常過於賦之所前取也。且終出之矣。而田主食租之戶最病。彼既出之於租矣。又將出之於其家之歲費。是再割也。故德瑪寶謂賦加需物。稅一而溢於物價者。常四五番。非虛語也。今如賦加皮革。則價之加此稅者。先見於所用之革鞞。而凡鞞工與革匠之所多費者。皆富民所爲出也。若鹽賦。若肥皂之賦。若蠟燭之賦。凡匠者所需之物。稅之則皆於價焉取價。又轉而歸戶。皂工燭匠所



用之皮革其賦亦富民之所終出相乘益蕃故曰稅加需物稅一而溢於物價者常四五番也

大不列顛所賦之需物四鹽也皮也肥皂也燭也則請先言鹽賦夫鹽賦之由來舊矣幾無國無之古羅馬有鹽賦至於今則歐洲各國皆賦鹽蓋一民所食之鹽歲計甚少而一時之所市不必多故雖有極重之稅不甚覺也英國鹽每布歇落賦三先令四便士是於原值爲三倍他國所征尤鉅至於皮革是真吾民所需者無論已而肥皂則自用白蠟以來其爲物不可少英之北緯高冬夜長故勞民待燭皮革與肥皂每磅稅三便士燭每磅稅一便士以原值論則皮革爲什一之征肥皂則百征二十五者也燭最輕然亦百征十五凡此皆重賦也此四者皆需物今國家賦重如此則勤苦之民歲費自進而工庸有不得其賤者矣

案英國鹽賦至一千八百二十五年始廢法國自民主時廢德國用就場起課及出口加權法合邦後得賦歲二百餘萬鎊若義大里奧地利匈噶利美利堅皆有

之獨印度鹽賦爲歲入大宗。次於田賦。開一千八百九十六年。所得至八十兆七十六萬羅卜。是爲英金五百三十八萬四千鎊也。其行賦之法。與德國大同小異。夫鹽課裕國如此。顧英法不用者。則以鹽爲食肴之將。貧民所必需。民愈貧。其任稅益苦。且製造用鹽者多。如玻璃。如肥皂。如強水。皆用之至多。鹽有稅。則其業不進。故甯廢之也。中國鹽稅。重甲諸國。而公家所入爲微。且姦利之厚。民趨如鶩。法峻則嫌於罔民。寬之則梟民日衆。爲地方隱憂。不止耗損國課已也。

國之冬寒如大不列顛。薪炭實生事所必資者。不獨烹飪所不容缺也。夜作之工。非是不可。而薪炭之中。則石炭爲最廉。薪炭貴賤。於民之工作有大殊。故大不列顛製造諸業。皆萃於產炭之區。其他所以此物價貴。不能與爭業也。且其物不止於禦寒。如玻璃。如鐵。如他諸金。皆得之。而後事舉者。故使商業獎政可行。則運炭一事。其由產所運至無炭業場之商。政可獎也。顧吾國政家。於此事不徒無所獎。且令凡運煤由內地往海濱者。每噸加征三先令三便士。此如以常煤當礦之價爲較。幾值百而

征六十矣。此政行是炭賤之區。用者無稅。而炭貴之所。轉有厚征。是非倒置者耶。

案此賦久罷。且與法有條約。凡煤出口不得加征也。

凡如是之賦。雖使需物價騰。而庸率亦因之以長。然於公家則爲歲入之鉅。所不易收之於他道者。故雖知其累民。而不顧即罷。即如獎穀出國。其效亦以使需物價昂。而諸弊從之。然獎輸之政。既累民矣。且於公家有厚費。是其害過前賦矣。此外如加重權於外來之穀麥。禁生口醢肉等之入關。其害究終言之。皆無異於前賦。而於國帑不加豪釐。使當國者深知其損下。而於上又實無益也。將不崇朝而皆罷之矣。需物之有稅。各國所爲。有過於吾英而無不及者。如磨坊之麥粉。如餅家之麴麴。稅之者不僅一二國已也。荷蘭城中之麴麴。其價倍在野者。則稅爲之也。甚且揣其民所食麴麴之爲何種。歲令出賦有差。其食上上白粉麴麴者。歲出六先令。九便士半。如是之賦。雜然並行。不數年之間。而荷蘭製造之業大耗。其他國行此。輕於荷蘭者。若米蘭若稽奴亞。若摩登那。若拍爾馬。若伯黎生。夏若奎士達拉及教皇所轄地。皆

不免往者法蘭西一有韓文公嘗論欲罷諸賦而專稅諸物故顏亮嚴有言天下無有狂悖之談不經通人先發者正言若反正謂此耳

至取民食隱賸而賦之者諸國蓋多有之夫謂隱賸爲生所必需是誠猶過嘉蔬五穀益之以脯乳醢羞雖食無肉足可養人且食之而肥澤者有之矣其事又非風俗之所逼致若前者白帶中衣革鞮草履之屬也

物或饒或需其所以賦之者有二術曰漸曰頓漸者民用一物上責其以歲時納賦者也頓者物在賈者之家知其將散爲民用則總而豫賦之也川漸之術者宜於物之歷年所而後徵者物之一用而無餘抑歷時甚短則利於用頓矣如車稅如金銀杯棬槃盂之稅宜以漸也至於餘物之出抽調與關梁之權者皆頓之義也

今如四輪之車善用之可以十年不做國家於是車而賦之則一算而盡其應賦者於賣車者之家可也乃令賦之於畜車者歲征其四鎊時而納之必出此而後有畜車之權利是之以漸較諸一出而四十八鎊之以頓者其於民爲輕明矣黃白之格

棧盤孟畜之者可以百年。今法使其家有百翁斯者。歲出五先令之賦。其賦相準斯爲百一。設賦之以頓。合三十年之漸者而總取之。則其價之長者百三十也。其於民爲重又明矣。今夫屋廬亦歷久遠而後敝者也。故其制賦也。於方成而取之以頓。亦不若分歲而取之以漸之爲便民也。

往者德瑪竇欲廢一切用物之賦。無問其物之久暫。而令用者以歲時納一定之稅。以市川享其物之權利。此其法意在省商賈出稅之資。而悉其力注之於其業爲母財也。蓋關稅爲商賈大宗。而又用之於無所能生之地。使其衝用則商者所有之財可悉斥之以爲轉貨周運之需。如此則通商廣而捐業之受益尤多。雖然。其說明於一而闕於四也。設國家取凡一用無餘與歷時甚短之物。而皆變其賦法。使宜頓者而皆出之以漸。則其弊有四。一其爲賦必不平也。昔者權行於貨。而貨價以增。是民之出賦與所用之貨相消長。而無毫髮之不平。乃今一用其物。不問多寡。則使出歲時定額之賦。是百榼之酒同於千鍾。一斛之茶等於百餅。可乎。二其爲賦必不便也。

推行於貨而貨價以增所出之賦與所用之多寡相準故民得自度其力之所至與其時之所合而出所能任之物價即以完所能完之賦資則其操縱出入固在民也乃今易之使以歲時出定額雖力甚不及時甚不便猶當爲之否則催督者至其爲不便又何如乎三其爲賦非教民儉節之道也昔者民知出賦多少權自己操是故努力爲儉乃今易之使出歲時之定賦而用之多寡不論民又何所故而勵儉德乎四其爲賦將使吏爲苛擾之事也夫其賦既不平而又使民納其所分出者而爲歲時之總額則出賦者必將以爲難昔者之賦出於不覺者也今者之賦出於可指者也可指則惜之而催督之政乃騷然矣德瑪寶之議以四不便而易一便一便在商而四不便在通國故曰明於一而闇於四也雖然是法也諸國之中固有行之者矣荷蘭民欲飲茶則宜出歲時之賦若夫生事所必需之麤麴彼亦以是衡賦之則吾所前論者矣

貨物之征有二一曰抽調一曰關權抽調者所征於本國之產銷於境內者也關權

者海陸之隘。設爲關梁以征外產之入國。內產之出國者也。抽關所加。不過數物。大抵皆銷行極徧者。貨之何者應抽。何者應權。與某貨所出之稅爲何種。此皆釐然易明。不致淆亂者。所抽之物。雖爲常用。然皆在饒而少在需。需而抽者。四物而已。鹽。皂。皮。燭是也。

關權之征。較抽關爲更古。關權俗呼例錢。可知前古以來。此爲成例。其始不可考矣。古人之意。皆以此爲分取商賈之奇贏。蓋當拂特草昧之世。邑居商賈諸民。自酋長貴人視之。不過奴隸之新釋負者。其人所不齒。其贏所心慕。則重調權以困辱之。且拂特侯伯既許其王加力田者。以泰理諸賦矣。則取所不護惜之商賈而侵漁之。固其所也。蠻野之人。智慮短淺。彼又安知商賈之贏。有欲征之而不能得者。計其終極皆銷其所行之貨者出之。彼不過先完之已耳。且商之爲業。計母資贏者也。既已先完之矣。則亦有不益以後利而索償者。徒言困辱。又何益乎。甚矣其愚也。

其甚外語之贏。則較之本國之商爲尤甚。故吾英之爲關權也。於彼此之際。往往賂

重輕之其始之爲此也。由於愚不知計。其沿而不改也。則以爲率權。以爲抵制。意亦謂得此則本國之商。本產之貨。皆可勝此以勝外國也。

故物無論爲需爲饒。爲出國。爲進口。重輕皆有權。意亦謂需饒進出等耳。何所取而優其一細其一乎。英古之爲關權也。恆分爲三支。一其由來最遠者。爲革羣之權。大抵皆出國者。降而英國有羣業。彼懷羣留國中。而王稅之。或以減也。則取成罰而加征抽焉。其次曰噸錢。噸錢者。酒權也。以噸計。故名。又其一曰鎊錢。鎊錢者。凡他貨。可以鎊計值者也。義都法第三之四十七載。凡進出之貨。除酒革羣三者。自有稅外。餘每計值一鎊者。權六便士。理查德第二之十四載。加權至一先令。尋復爲六便士。顯理第六之二載。加爲十八便士。尋復降爲一先令。自是至於威廉第三之九載。皆爲一先令無變。考噸鎊二錢。皆以王用乏絕。詔民協助。議院乃以冊許諾之。故二者皆名爲薩白錫帝。薩白錫帝者。猶言扶助云爾。鎊錢。以鎊權。一先令爲制。久是爲百五之稅。故後有百五之稅。亦相沿以爲扶助之權矣。後有新賦。則以此爲舊助。以別之。



舊助稅則皆用察理第二所定者。新助助於威廉第三之十載。約取大半貨物而加百五之征。嗣又有三分一三分二等助稅合之。則爲第三次百五之征。然而未已也。一千七百四十七年有第四次。一千七百五十九年有第五次。其所加皆百五。總舊助爲百征二十有五。特四五次所加者。皆有專指之物耳。考其加征之由。是五助者。或起於王用之絕。或於諸貨意有所輕重。或用護商者抵制之說。其政遂不覺其差如此矣。

主護商之說者曰。益多而舊助之資於諸貨者。無間進出。後之四助稅。及後起擇貨爲征之權。則悉責諸進口者。而古所爲出口貨稅。其責諸本國之產者。則罷之或輕之。其求出急者。則益之以獎勵。外貨入口更出。則予之以掣還。以鼓捐業。惟舊助一稅所掣還者不得過半。而他助則盡掣之。大抵皆以獎出而嚴其入。其入而蒙輕減者。獨一二生貨。凡以爲製造之資者耳。蓋工商以謂獨此而後物稅輕。而或貨廉。可以爭外市。故有時至盡免其稅。如西班牙之蠶桑。招其入則斬其出。故以此出而抑

由關境別運者有禁或重征以沮之禁者如英之羊毛蠶重者如德之皮沁尼葛之膠蓋自英得關那達沁尼葛若此類貨產皆爲關斷專市者矣

夫護商法爲商宗計家謬論從其術不足以富民吾於部內既明之矣乃今觀之其術且不可以蔽國從而用之賦稅必因以大損夫護商法行貨之入口與本產爭者必禁禁則其貨絕於進口抑進口矣不以公而以私私於關權仍無益也英市外國毛毳絲絨之貨皆無有知關權之所亡大矣

其次則爲加稅以沮外來然稅重則茲利深國人者日益夥關權之所收有轉不及平稅者吾聞諸瑞弗德博士算數二之與二四也和關梁之算與常法異往往二之與二不爲四而爲一務爲厚征而不知止者於瑞博士之言可深長思也雖然是之加稅國家意非求多也爲護商耳使非護商決不出此下策也

於本國物產之欲求出者則爲之獎勵於他國之產欲其轉以得利者則爲之掣遏以是二政之故姦絲以生而關稅大耗蓋商以欲得二者則往往其貨登舟出口矣

而還復本國之他口。國家緣是而損者。歲至不貲。會計俱在可覆案也。如一千七百五十五年首月五日。統計前歲關稅。得五百六萬八千鎊。而獎輸（是年無輪穀之獎）者爲十六萬七千八百鎊。掣還者爲二百一十五萬六千八百鎊。二者合爲二百三十二萬四千六百鎊也。又關費俸庸共得二十八萬七千九百鎊。實得二百四十五萬五千五百鎊。其所費於總收爲百五於實收爲什一也。

進口諸物。其關稅既重。諸商運者。大抵皆闕入矣。故其貨不臻。出口之貨固無稅。而商關得獎掣二資。又欲張大其業。則薄過其實出之數。故從關稅之薄而稽進出之差。恆正無負。抑且相過數多。其時當國主計者得之輒大喜。彼固以進出之差占國貧富者也。雖然。祇自廣耳。於國財之實。無毫末益。而且有大損也。

一切進口貨物。例不優免者。大抵皆稱。其有稅冊所不載。則估值每鎊征四先令九便士又二十便士之九。蓋合五助稅之算也。吾英稅冊載物至廣。有不經見者。一貨之至。不知所歸。稅則難定。主權之吏常因此而蒙大罰。而運貨之商。亦緣是而滋費。

故以明晰整齊言關權之賦政遠不逮內地之抽調也

以國之有費故處於其群之民宜比例所費各出賦以供國家此土產稅也苟自此而言之則不必凡物之進出口者皆有權矣今夫內產之抽調未嘗備物而征之也然其賦所被於國民者甚溥何則彼獨取其數舉舉大者而民已莫能外也故計家之意以謂關權之政亦當仿此爲之誠使治之有法國家之稅將無所損而治稅之費既微且大便利於通商之政也

大不列顛所銷外產以葡萄酒與普蘭提酒爲最多餘則美洲西印度諸物產若糖若糖酒若菸葉若椰子等其東印度諸物產則若茶若加非若支那器（西國謂磁爲支那器）若蘇往之屬凡若此者關稅所出之大宗也其製造諸熟貨則大抵權之非以爲賦爲抵制餽商而已今使悉去煩苛而行之以大通至平之政往事可鑒其賦必不見損而見增而國中之民又不必失本產自然之利將見前之無稅者今可以有稅前之稅少者今可以稅多也

蓋稅權煩重之物其銷售必寡且闖入之姦利益厚而愈勸爲之雖日以刑罰從事其賦之所出常較平賦之時爲懸絕也故國家於賦權減收之時知其病之由於沮銷滯礙者救之之術舍減權其道莫由也

若察其稅減之故起於闖入偷漏者之多其救之之術有二一曰減權使闖入者無所利而莫之爲二曰增防使偷漏者其事愈難而莫肯試夫減權之效其理易知其事易行可勿詳論而增防之術則有已行諸內產之抽調而無弊者其法政可仿而行之也

今使運貨入口之商其貨例有權者則從其所便納之於商之私屯抑致之官設之廠厝吏司其鈐必請而後開其納諸私屯者即繳應完之權永永不許掣還吏隨時驗之察貨權之果相應否其致諸官設廠厝者不必即繳至於發而鬻之然後如數以納無不可者設出以外運轉售他國者例得免權然須得保者以明不欺其發鬻本國之數吏隨時省驗其已出既權則官予符憑以爲徵信今釐酒其權法政如是

餽酒然他貨物何不可皆然耶顧所難者在所權貨多官不能徧設廠店以受之且  
有物脆時須省護而後可者官不能受之也故欲用是術必應權之物國家擇民用  
之最薄者盡萃萃數大端而止然後其術得利行耳

苟用前術則雖甚重之權漏者必稀而國家制權之方務時爲進退則於所入至多  
而後勒爲定則夫賦稅所以求邦用而非爲國人壟斷地也故使操之得其術即取  
寥寥最普之數物而稅之國之所收即不能過今額亦可無所不及者而簡節疎目  
其易知易行與抽調賦同則甚善之政也今關權之弊在掣還者多欺用前術則奸  
無所售且用此則獎輸可廢棄於彼而收於此二者相當之餘吾決知後賦之必勝  
今賦也

案羅哲斯曰英國關權奉行此術而斯密氏所言語語皆應燭照數計無言不實  
是真經國聖手矣

假使國用吾言即關權變法之後公家僅僅不至受損然國中製造工商之家將緣

此而沾大益無疑義也。蓋關於百產有權有否。此不權者。一切可以自由往返。絕無窒礙。而其物又大抵皆需者。與夫製造所資之物料。如此。則其價必廉。廉則庸率必減。而勞民不傷。蓋銀之真值。以所得需物之數爲比例。而需物之值。又不以易銀之多寡爲高下也。故使工價降廉。則國中之百產必賤。賤則運致外國。必以易售。且自物料之權既除。將製造之物產。毋本愈輕。而其價愈平。如此。支那印度之絲。入口不權。吾英絲貨。必與法義之產爭市。無難。則又不必取外國絲貨而禁其入口。明矣。蓋成貨甚廉。吾工商之所致者。不僅有以奄內市。且有以傾外商故也。然此自不權之貨物言之也。即其權者。獨無利乎。果行吾術。凡貨之入廠磨者。轉以外售。固爲無稅。無稅則捐業大輕。轉以內銷。亦必俟臨售而後納稅。取當其有。故其出賦常輕。較之進口。即征所差甚遠。故雖權貨。亦有利也。

昔衛爾波勒之定抽調稅則也。專重菸酒二物。其稅法與右之所擬者大略正同。當其議初呈下院時。意固以菸酒二者爲嚆矢。後乃徐及其他。黨人挾門戶之見。商賈

懷偷漏之私乃群謀而排之其議遂寢有其廢之莫之敢舉故其稅則至今無增損也。

若外國所至之饒物關梁之權出於貧民者十二三而出於中產以上者蓋十七八也此如葡萄酒若加非若勾古力若茶荈若饌皆此類也饒物廉者本國所生而行銷國中若取而稅之則其賦資富諸民所出相若而與其用費有比例此如麴蘖麥酒貧人出其所自用者富貴出其自飲者矣而兼出其奴僕所歲銷之賦也。

雖然民有貧富之不同而國中產以上之家少中產以下之家多故其銷貨也中產以下之所銷其總必多於富者以數計之如是以值言之亦如是也此其可推者有四一國中所有之母財大抵皆散之於勞力者以爲庸也二國中所收之田租與夫母財所出之贏利多以養僮僕與夫不生利之功役也三中人之家斥小母以收薄贏此如坐肆開列行鬻零售之賈是已顧小母之積常過於大母而薄贏之積常過於厚贏四中產以下亦有田租勞力之民亦掌地業故其家歲費雖人計甚微而積



計甚鉅。常爲通國歲費之大分。而富者所費之積。言數言值。皆不及之矣。以此四者而言之。故制稅之事。若所權所抽之物。必爲富民之所用者。則其歲進必劣於貧富諸品之民之所同用者。且必劣於中產以下之民之所常用者。夫曰稅富不稅貧。其意固甚誼也。而國用裕否。則不可知者矣。此制賦者之所要知者也。如英之酒稅。其抽於本產諸釀諸燒者。其額最賒。一千七百七十五年。積三百三十四萬一千八百三十七鎊九先令九便士。則以其酒爲小民所常飲。故能如是鉅也。

然則貧固可稅。特所稅者宜在饒而不在需。使其需者而稅之。則將有前陳之弊。然稅之終極。終在富而不在貧。在歲殖之少數。而不在歲殖之多數。且其弊將使功庸降貴。而求備者稀。備而貴。欲出稅之不終於富。不能也。求備稀。欲歲殖之日進。不能也。歲殖者。國賦之大原也。故稅行於需。使求備者寡。其庸率之進。必過於以他道致寡者。然其所取進之加費。舍國中富民無從出也。議賦者。尙無作法以自蔽焉可耳。

抽調行於內產而關權征於外來。此貨物之征之大較也。其他諸國所行尙有數稅。其轉移物價。愈隱而不均。此如法國之卑亞稅是已。卑亞稅者。猶撒遜時所征之過境錢耳。其初制以脩一道路河渠。而欲其常得脩費也。則設爲關閘以征抽之。然凡如是之賦。其制率也。常不以值而以重。或以方體言之。以其爲一地之專費。故治賦之事。恆委之其鄉邑與夫主地之家。賦集而道路河渠塞者。鄉邑主地之家與有責也。乃或以國君王者而主其賦。國君王者不可責者也。則賦增而事廢也。固宜如是之賦。其極必在銷貨之家。願銷貨之家之所出。不與值爲比例。而以所銷之輕重微鉅爲差。然則粗且賤者出賦多。而精且貴者出稅少也。故曰不平。向使如是之賦。不以重大而以值爲率。則其賦固無異關權之行於內地者。內地有權。其勢礙於境內之商。境內商業之最要者也。

歐洲今日小國。多於邊地設關。征過境錢者。此如義大里北部波河之濱。多逢此權。以稅鄰境之商。而於本境貿易之民。則無所沮。天下過境錢最大。在丹馬之海岔。其

水名騷溫德。凡商船過此者必征之。

案騷溫德過境錢於一千八百五十七年三月議罷。緣美人先言不出此錢。丹馬不得已。受諸國三百三十八萬六千二百五十八鎊之資。而廢其利。當是時。英所出者爲一百一十二萬五千二百六鎊。而美亦別奉丹馬以七十一萬餘元云。

國家每歲所收之賦稅。大抵皆出於餽物。雖於租庸贏三者無所專征。而其財終出於銷貨之家。然以爲平。而謂出賦者各視其力之大小爲多寡。則未必然矣。蓋其爲物也。富者之銷不必多。而貧者之用不必少。亦各從其喜好之無定者已耳。人有巨產。而年未及了。則從其銷物之量而言之。其助於國費者蓋寡。然以其產巨。其託於國家之保護則甚宏矣。人於本籍有巨產。而寓於異國。則從其銷物之事而言之。其助於國費者無有。然以其產。其託於國家之保護則又甚宏矣。使其國若今之愛爾蘭然。無履畝之稅。而產之易主也。又無契約之賦。則此人以國家之懷保。得收無虞之鉅租。而其所以報國者。未嘗有角尖之費。其爲不平。願待論耶。且其不平之情。處

於有屬之國爲尤甚也。身居於宗國而廣置其產於藩屬之邦。今英人之置田於愛爾蘭者。皆此類也。往有議立法專稅客田加重者。而愛爾蘭人大譴。無惑乎其如此矣。獨是稅之矣。而稅之之道。當如何而後爲允乎。夫用物之稅。其出之多寡。民之所自爲者也。使制賦者估其多寡。而行之於易征之物。民之出之也。將若無事焉。蓋貨物之賦。其完納者工商也。陰行價中。而用物者遂以爲價。而忘其中有賦稅矣。凡如是之稅。不平可也。不信無恆。吾知免矣。民所應出之賦。爲數幾許。納於何時。皆可勒爲一定之成憲。使民周知而易從。故使大不列顛調權諸賦。與夫他國同類之賦。行之而有先後參差之弊者。此其故。非賦使之然也。布法之不明。行法之不謹。文字糾繞。使民靡所適從故耳。

稅加於貨物。常陰行於物價。而出者不知。且民之出是稅也。其勢必以漸而不以頓。囊中有錢。市其所待用者。而稅與比例焉。故以完納之時。與完納之法言之。稅之便民。無逾此者。是賦也。與吾之首三例常合。而與吾之第四例常分。是亦有所不得已。

者矣。

夫所謂第四例者言賦之必覈也。覈者出於民一歸於公者亦一雜費少而中飽祛也。乃調權之賦其所征諸貨物者視征抽之多寡其出於民與民之所不能得者必多於公家之所收者。不能若地丁諸賦之覈也。嘗察其所以不覈之故而知其致此者有四事焉。是可次而論也。

一凡行是賦雖出之以至公至平之道然其勢不能不多設關津廣置稅吏其俸祿獎犒至夫解舍舟馬一切之用此皆賦民最深而於公帑無毫釐之益者。雖然以吾英之所費以與他國之所費者比則猶爲綜覈者矣。如一千七百七十五年七月統計前一歲之所統收於抽調者得五百五十萬七千三百八鎊十八先令八便士而諸費爲率百約五五其餘尙有獎輸聖還二政之所減者則是歲國所實收必在五兆下矣。一其年實收調賦爲四百九十七萬五千六百五十二鎊十九先令六便士一。是年鹽課亦爲抽調之賦然重前賦異術則其費大逾於此實收不及二兆半而

所以爲課吏俸食者率百十焉。夫調權之費大抵吏役俸少而雜費用多。後之強前或至三倍。今鹽課吏俸既百十矣。則益以雜費雖率百二十百三十焉。可也。吾聞關權之政舊於抽調。政舊則弊叢。政新則弊寡。此其大較也。今麴藥麥酒雜征於調權二者。假使總於麴麥一賦。則年省稅費可五萬鎊不止。此在一轉移間耳。至於關權諸稅盡於犖犖數種之物貨。而稅法仿抽調之成規。將所省益以不費。而其賦可以覈。

二其賦既行。則常爲民間生業之沮力。蓋調權行於物貨。其價值必增。增則銷售比例以減。而供者亦比例以微。使其物爲本國之所產。製者供者既微。則備之爲數亦寡。使亦物爲外國之所運入者。經權而其價必騰。騰則內產與同物者亦可以邀一時之利。而移其勸功以就其業矣。雖然前者詳論之矣。此一業一時之利雖殷。終不敵他業之所受損者。蒲明罕者。吾英鐵業之場也。今使其地之人所以酷外國之酒醪者益貴。豈不徒貴則彼所以售其鐵器者必益廉。廉故於製者值微。而彼之所以

趨業者不勸矣。大抵兩國通商。此之所以取彼者愈貴。則彼之所以取此者必賤。此不易之驗。以貨易貨如是。以幣易貨亦如是也。故厚征外貨者。未嘗不轉以自伐。蓋吾貨賤。則所以鼓工業者亡。而內產之工。必以退。故加權調於日用之物者。爲需爲饒。皆善治國者所至不得已。何則。以其效終於民業之降衰故也。賦於內產者。將其效徑賦於外產者。將其效紆。以終事言之。無所異也。且吾於前部既言之矣。凡賦之事。皆有以使民之生業不由於自然之塗。常棄其大利者。而即其小利者。故賦之不中。則民貧而國耗。嗚呼。可不慎哉。

三。賦政繁。則民之坐隱匿偷漏而破產亡家者衆。夫隱匿偷漏者。民之無良也。而不盡山於民之無良。向使其國政平而賦簡。是犯法者。雖終身爲懷刑親上之民。可也。然則是犯法者。乃國家先爲陷阱。而徐責民之入其中者。爲無良也。設其事果爲無良。則不獨爲上者之待之以刑罰也。民之秉彝。必群然以其事爲不誣。衆惡而共歸之矣。今試問此隱匿偷漏者。有親行其事而心以不安者乎。有見其鄰之爲此而心

惡之以爲不誼者乎。是逃賦一事。國家雖加以刑。民終未嘗以其事爲不誼也。生於其國。親見爲其長上者食租衣稅矣。又不恤民力。聚無藝之賦。以供不急之功。取艱難之財。以事侈靡之役。其腹誹心非之日久矣。故能逃免之者。人勸爲之。而不以爲惡。設有人焉。指其事爲非法。禁其貨而不敢收者。此其人必不見敬也。方且以爲矯情飾行。而共疑其人矣。惟其如是。故逃賦者不自知其非。脫有敗露。且以爲不幸。而其謀救之也。與救誼取之財等。其始之犯法也。或止於失計。其終之抗法也。或陷於犯上者有之矣。卒之國法果伸。而其人之財。向之所以發業勸功。爲勞民之所庇者。乃今或以籍沒。或之賞告者。而其用之術。大抵皆不生後利者也。夫轉生利之母財。以爲禁奸之贓罰。民之不幸。而國之尤不幸也。而誰則尸之乎。

四。物貨之征行。則稅吏有稽察之責。而民若不得私其貨者。用苛虐者十之二三。而煩擾則無或免者。夫煩擾固未必竟傷民財。顧民以失事廢時。有時且較傷財爲尤酷也。故吾英抽調之政。煩於關稅。關稅一征之後。無餘事也。而抽調則時時有覆驗。



之事緣此而民苦之而吏亦以身爲怨府。謗中傷和之者衆。願亦有以吏之勳職。奸不得售。而造作口語者。不盡實也。

故國有貨物之征。欲其無擾於民。雖然持英之政。以與他國之歲費相若者較。則爲清靜之尤者矣。英之政未盡善也。其有待於損益脩革者尙多。然已非鄰國之所敢望也。

則姑以西班牙之賦政而言之。彼之主計者。以物貨之征。爲征於商賈之贏利也。故貨之在市。每易主必征之。彼且謂國家於內產之製造者。外貨之運入者。旣征之矣。如此。而欲其賦之平。貨未至於用者之家。必取其零售小賈一一征之。而後可。此西班牙亞爾加化拉賦法之所以立也。其始立也以什一。繼而百十四矣。乃今則爲百六。而責之於一切交易之事。爲田宅。爲粟穀。爲布縷。爲珠玉。莫不然而督稅之吏。徧於國中。凡貨之轉。不獨異邑異城。必有察者。由東家之肆以入西家。而吏從其後。民一舉足。輒絀賦網。故國之賦政如此者。其地力民功之所產。終無滯而不可以行遠。

貿易之事盡於地著而止。此國之所以貧。而工業之所以不進也。爲斯他栗茲謂西無工業。其端在賦之苛擾。可謂篤論。雖然。但言工廢猶未盡耳。農業之衰。不由他故。蓋其賦不僅爲熟貨之殃。實亦爲生貨之害也。而吾英詎有是哉。

即若尼波羅國。其一切貨物。亦有百三之稅。此較西班牙固爲輕矣。而內地城邑鄉井。則納專課以免。故於工賈爲無礙。而民力以蘇。不若西班牙之苛碎害民也。

大不列顛之賦。大都一律。而於內地之交易轉運。則一切聽民自由。抽調所及。不過數宗。餘則自南而北。行兩海之間。廓然無遮。莫有梗者。其由內地以抵濱海之貨。官爲符與之。自石炭而外。無所權。惟國內商務利通。且賦行齊一。無畸輕畸重之差。此吾英所以有今日之庶富也。蓋本國市場。爲工商所最重。而小民之舒戚視之。而吾英賦稅廉平無擾如此。欲國財無進不可得也。誠能擴而充之。至於愛爾蘭美利堅諸屬。將見國之榮華。與夫藩屬之美利。大加乎此。而且暮可企者矣。

賦稅之道。所惡於煩擾者。非僅取民無辜已也。以其常爲道路商旅之梗云耳。爲道

路商旅之梗者。於國家無毫末之益也。而於民生有邱山之損。而國財亦緣之以不  
 充。法蘭西之爲賦也。部與部異章。則多設稅吏。不獨周於國之四境。部省之界。羅置  
 稅邸。以防閑入之貨。其爲累商旅。梗塞道塗。幾使國無行貨懋遷之便。其鹽賦省各  
 不同。有專課者。有免課者。菸葉爲駟僧辜權。而有省或不禁售菸。法之愛底稅。即英  
 之抽調也。其賦法亦省與省殊科。或奉專課而一切免征。或有愛底稅矣。而商稅總  
 設牙抽。則越鄉而章則互異。脫來提者。即英之關權也。其賦法則分一國爲三支。一  
 用一千六百六十四年之稅則。號五大牙者。一以先是貨物之權分爲五支。而各爲  
 其地民設牙自抽。故名。一如壁加第如諸沙第及內省之大半。皆用此也。二用一千  
 六百六十七年稅則。號外省。而沿邊諸省用之。三本非外省而作爲外省者。以准與  
 外國通商故。其與法他諸省懋遷。出賦權與外國等。此如阿爾沙斯及墨芝吐勒倭  
 丹之數省。丹克佩淵馬賽三錫特。皆此屬也。所謂五大牙者。與作爲外省者。地有專  
 課。逾境輒異。而馬賽尤甚。夫其賦政繁猥如此。則何怪所設稅吏之多。而商旅裹足

乎。

法之賦法煩猥。其病民既如是矣。而產酒諸部。其酒稅尤苛。故今法國產酒名區。轉在葡萄田稍遙。而賦法寬紓者。賦寬故產之所通遠。產之所通遠。故民樂於種植。不  
易之理也。

雖然是煩猥之賦法。不獨法民受其敝也。米蘭一獨克封地耳。其中分爲六省。省所  
賦貨物不同。賦之章則互異。拍爾馬愈小。亦獨克封地也。中亦分三四省。而行異賦。  
夫道國之不平不通如此。而其國未至於極貧。民物不復返於草昧者。徒以土壤膏  
腴。風氣良善故耳。

近世國家之責賦稅於其民也。大抵有二術焉。或官設吏胥。以監其權。事之善否。稅  
之盈絀。國家設殿最之考績。如是者。其所收賦額。可年年殊。或國勒定額。而承之以  
牙僧。俾置備夥而自督之。其征抽於民。雖遵成法。然關於牙僧而外。不置問也。其備  
夥亦知有牙主而不知有國家。是故承稅以牙。非稅政之美善綜覈者也。定額國課

既繳之餘。備愆之辛脩。征抽稽察之勞費。皆出於所稅。而牙商之母本有贏息。所慮之危失有保險。所經之煩劇有所酬。所資之智巧有所市。使其劣此彼牙僧所必不爲也。使國家制爲稅政。即與牙僧同其事。而贏息保險諸費可以免矣。二者公中所失之最鉅者。彼僧之承一大宗稅課也。常必具甚厚之母。而身家稱之而後可。故常民與之爭承難。母厚信託矣。又必精於其術。悉於其事。而後可期於有利而不折閱。如此。則爭承其課而牙之愈難。難故來者益寡。當官之出是課以募承者也。此寥寥數人者。知非彼莫能爲也。則變其分而爭者爲合以共利。往往俟至約之額。而後起而承之。而其利乃益豐。則無怪國之爲牙以稅專貨者。其牙商皆轉瞬財雄一方也。夫封殖必叢怨。徒富已爲邦人所側目矣。矧新造之家。必樂崇飾以自夸耀。其爲民之所嫉惡滋深。宜矣。

案中國貨物之稅。幾無一而非牙課矣。夫牙課者何。上收一定之額。征凡其有餘。則承者之利是已。夫是之謂中飽。是之謂牙僧。而中國稅不中飽。官不牙僧者。誰

乎。夫鹽課之大。固無論已。他若各口之鈔關。各省之釐卡。主之者雖名爲官。其實皆牙儉耳。此中國賦稅其大弊。所以歸於不覈。多爲沮抑。於國無利。於民大損。一不覈也。割爲中飽。民出者多。國得者寡。二不覈也。此上下之所以交喪。而靡恥之。所以益衰。舉坐此耳。

凡爲牙儉。必常以國家督稅緝私之法爲太寬緩也。彼於出賦之民。固無愛耳。就令以稅重賦煩之故。民不堪命。輾徙流亡。彼未嘗以之一動心也。誤完彼富。即通國皆貧。彼之享其利者自若也。當國家危急存亡之際。爲之君者。常以賦之盈絀爲憂。而儉於此時。則曰國家欲課稅之常供乎。惟嚴峻其督緝之刑法而後可耳。不然。求及常額。不可得也。而國之君。聳然從之。此賦稅之律。所以降而益酷也。試一覽於大陸之列邦。其賦法深刻者。大抵皆牙稅之國。而寬厚仁愛。則國君自督其賦者。是可以知其所以然之故矣。雖有暴君。其恤民之隱。哀民之窮。必過於汙吏。而牙儉則並吏而不如。夫身爲國主。知其族姓之榮業。係於黎庶之福祉。邀一時之利。害其民生。而

以國爲殉者。非喪心病狂之夫不至此。而充牙僧以承其稅課者。則大不然。民之禍敗。彼且因之以爲利矣。黎庶之騷虞。非彼之幸福也。

國有制一貨物之稅。既以其稅付牙僧矣。又使之得壟斷專利焉。此如法國之菸與鹽二物是已。如此。則其僧同時而收二厚利。牙其稅既不替矣。專其市愈不替。夫菸物之饒者也。購與否。多與寡。隨其人之欲可也。鹽物之需者也。人人必取之於專利之商。不取之於僧。則必取之於私矣。且二物饒與需不同。而其稅皆至重。故爲偷漏之私愈衆。怵於重利。而不能自制故也。願國則設爲至峻之法。牙商又布至警之胥。以督察繩罰之。而民遂多亡身破產者矣。吾聞法蘭西以菸鹽二賦。民之軍徒流徙者。歲不下數百千萬人。其死於法者又甚衆。而法國家所收於兩稅者。則歲以大萬計矣。其一千七百六十七年。菸課二千二百五十四萬一千二百七十八利佛。鹽課則三千六百四十九萬二千四百四利佛。二課牙約皆以六年爲限也。世固有人焉。謂下民膏血爲無所比於王者之帑金者。則其心是此政。而以爲不必革也。固宜。菸

鹽二稅爲牙課任辜權者不止法若普魯士若奧地利若義大里諸國皆尤效之矣  
法蘭西國賦之所由來者八曰泰理曰爲必達（譯言丁口之賦）曰威知衍（譯  
言二十而一之賦）曰甲俾（本義爲貨物之賦降乃專名鹽稅云）曰愛底曰脫  
來提曰菸牙課也後之五稅法諸省大抵皆募牙商爲之而前三賦則政府自領之  
法之計家皆言以所取諸民者比例爲言則政府自領而王所親督者爲較覈其有  
補公帑過於後五稅之中飽而虛糜者

案是所謂募牙商以爲之者無異中國所云商辦也其政府自領者猶中國所云  
官辦者也近數年以來遇一建置其爭官辦商辦之孰便者多矣大抵在官之人  
多主官辦而民間則多言商辦顧斯密氏之議如此則可知官辦固不必費而商  
辦亦未必遂綜覈而便民也雖然其事有爲國斂財與爲國散財之異爲國斂財  
者以商辦之未有不加酷虐而增中飽者矣是在議政即事爲衡而不可執一而  
論也



由此觀之法之計政所宜變法。變而國必大利者。有三端焉。一泰理與葛必達宜廢也。是二者廢。則國藏之歲入減。然威知衍其制等於英之地稅。算於田宅母本之租與息者。固可以加也。加之之度。宜令與前二之所亡相若。如此國藏之歲入不殊。而征收之費大省。小民下戶。其困於泰理葛必達二賦者。可以蘇。而上戶之民。亦免於二者之壓力。此一舉而兼數善者也。二若甲俾之鹽課。若愛底之抽調。若脫來提之關稅。若菸課。若一切之調稅。皆可勒爲一律均平之賦。使通國無異征。如此則民追吏胥之虐。而商旅得周流國中。其無梗與在英國等矣。三使一切賦政。皆領以政府而王親督之。凡有官司。皆奉君王之令勅。而能一切牙商賈賈。使中飽利絕。而國賦以嚴。夫是三者變法之利。不待深計而後喻也。顧公利常與私利相牴牾。人保其私而不顧公家之急。一旦易令。彼出死力以爭。亦其所耳。然則吾策之果行與否。正未易言也。

取法國之賦政。以與吾英絮短長。則法將無往而不負。大不列顛以不及八兆之民。

歲取十兆之賦。未聞有何等之民。爲國賦所困殆者。而法有民二十三兆。蓋三倍大不列顛之戶口。其天時地利。則比英爲溫而腴。且法之講於農政舊矣。其間通都大邑。隱賑駢闐。凡物之以時而後有者。法皆比英爲多。如此。則法之賦。宜歲得三十兆。鎊無難。而乃一千七百六十六年。法國國家之歲入。不過三百八兆利佛。至三百二十五兆利佛而已。是其數不及十五兆鎊也。是其數不及所與英比例而應出之半也。而其民且群然以其賦爲苛。謂非政之不衷。不可得也。雖然。法歐之強大國也。其政法之寬大優柔。吾英而外。不能不首屈一指者也。

案英民統蘇格蘭衛勒斯爲計。當斯密氏之世。乃不及八兆。可謂微矣。而至一千八百八十一年。乃三十兆。於一千八百九十一年。乃三十三兆。其十年進庶之率。約百民增九。是非國財有餘。民生日休。必不能如此之最驟也。天下進庶之疾。美英爲最。而美乃尤速。此馬爾達所以有幾何級數之說。此殖民之議。所以徧於歐洲。此非洲與區。所以不能不關。此支那蒙古。所以常懷人奴絕種之憂也。

乃如荷蘭取重賦於需物而國中製造之業幾盡循是以往政恐漁海船舟之業亦將漸廢大不列顛需物之賦有而不多故未聞製造工業有爲所病而饒者必言其苛則物材進口之稅斯爲最病而絲繭之稅則其尤著者矣荷蘭國稅凡五兆二十五萬鎊其諸部民不及大不列顛三分之一此以比例言知其取民之無制矣

國家平時於可賦之物既盡之矣不幸至於有事則不能不取所不宜賦者而亦賦之此誠無可奈何之勢也故荷蘭以民主之國而稅及於需此豈盡尹其國治其賦者之不智哉鄰敵眈眈逐逐而其民必保其自立自治自由之權事不得已必出於戰則雖以至節至覈之邦用有不得不增逋負者而賦亦比例而加此其所遭誠不幸而其志尤可哀也若荷蘭若西蘭皆瀕海之叢爾國也國雖小而其民志於自立則欲民主之存其海防必謹此二國之費所以益不替也雖然荷西之所以存而金甌不玷者亦恃其爲民主政制而已何則以其爲民主也擁資之家殷商大賈皆與國同休戚或紆或徑皆有謀猷國事之責彼以自治爲尊自由爲榮也故雖賦重國

危自役其財而贏寡以財貸人而息輕所得既微矣而用以易生事之所資爲需爲饒百較歐之他國爲少。然而足重國之民意且不以彼而易此何則自由之權與父母國相守爲存亡故也。惟富民雖困不去夫而後發業勸功咸有賴而民生以蘇。向使其國不幸民主制廢國之號令主於勦僭將帥則其國雖庸立而民權以亡民權既亡則國非其國而因與辱者皆可去如是則荷無富民而農工商賈之業皆不振其能至今屹然於列強衆大之間者寡矣。

案余讀是篇原文不覺爲之潸然出涕也。曰嗚呼何其言之沈痛也。今夫國者非他合億兆之民以爲之也。國何以富合億兆之財以爲之也。國何以強合億兆之力以爲之也。夫一統之世無論已一統者豈必幅員數萬里四封而外皆藩服而後能然哉。方其未通也汪洋之孤島如非支山中之巖邑如剛戈立一尊之君而臣妾其同種並壤之民如是者皆一統也。惟一統而後有無權之民以戴有權之君上下相安國以無事當是時也有倡爲民權自由之說於其間雖謂其有百害

而無一益可也。乃今之世既大通矣。處大通並立之世。吾未見其民之不由者。其國可以自由也。其民之無權者。其國之可以有權也。且世之黜民權者。亦既主變法矣。吾不知以無權而不自由之民。何以能孤行其道。以變其夫有所受之法也。亦既竊以知懼矣。懼爲印度。懼爲越南。緬甸。朝鮮。懼爲埃及。懼爲波蘭。乃不知是數國者。其民皆未嘗有權也。且深惡民權之說者。不自今之支那。愚儒大官始也。往者歐洲之勳貴公君。皆惡之矣。英之察理。法之路易。是已。其最不惡民權而思振興之者。亦有之矣。德之佛勒德。立美之華盛頓。是已。顧二者孰非孰是。孰榮孰辱。孰存孰亡。不待辨矣。故民權者。不可毀者也。必欲毀之。其權將橫用而爲禍愈烈者也。毀民權者。天下之至愚也。不知量而最足閔歎者也。

篇三

論國債

當夫一國治化草昧。商不出境。而工不修術也。民不見異物。而市無華巧可貴之貨。

於此之時。使其人歲入浩衍。則所以視其富溢者。舍廣畜從徒而外。無他道也。夫所謂多財者。非他其奉生之資。崇侈有餘已耳。而際商賈工陋之世。此奉生之資者。舍布帛粟稼稼穡牛羊羽毛皮革而外。又無物也。商之所通。工之所造。皆塊然至粗。彼多資之子。雖欲斥積畜以易珍貴之物。而無從。則自雄爲夸耀者。不出推解以衣食窮乏。盡其量而後已者。烏從出耶。故是時惠而不廉。豐而不華。凡所謂富貴之家。盡如此矣。此吾於鄙丙之所已詳者也。然惟其惠而不廉。豐而不華也。故多財之家。常善守其業。而無由敗。不若後世美好之多。奇袤之衆。雖精警之夫。聰明之子。亦有時逐所嗜而破家也。鬪雞走馬。事之微小者也。而以此敗業者。幾何人哉。今之世。以交游周恤。資其家者衆矣。古之時。固無有也。則世變之異爲之也。歐洲拂特封建之世。田宅什佰。常十數代不易主人。知其歲費之。不逾歲入矣。雖廣筵大醺。見諸記載者。至衆。自後人觀之。若非酒池肉林。不足以給也者。然自彼爲之。自亦謹度制節。未嘗過於其力之所有餘者。若夫羽毛皮革。其地所產。亦皆斥以易財。而其財亦皆斥之。

以重珍寶如珠玉金帛凡其時之地力人巧所能生者然其聚於府庫者必多而散於市者常寡無廢居之用舍藏弃愛護之外不知所以理其有餘故也且其時以商賈爲汚處至於府貨子錢尤爲律之所禁而自好者所不爲也以其時之不靖而群侯入征故皆欲皮置輕資以爲亡國奔竄之備又以施奪者衆則藏之惟恐不深此世異事遷所以多獲藏銀者主人往矣而他人是恤則卽此可見當時之情況矣中古以降書以出地藏銀爲王者進奉之大宗地不愛寶有時而竭至於今日則藏銀一宗不獨王侯所不藏卽私家貴人未嘗恃備來者爲經入矣

封殖藏弃不獨黎庶有是心也卽在國君其情等耳工商甚陋之國其君尤纖縻而樂積財不若後來文勝之代以奢侈相誇炫也蓋民椎樸而所通者欲求珍異勢有不能且寓兵於農而無額設則省至大之費而餘財尤多是故舍飲食徒衆教門客無所用也然而惠養周給之事雖費不糜而夸飾之爲其傷財過斯遠矣故吾歐古昔帝王府庫之藏甚裕卽今蒙古東胡其酋長大人亦皆富於積聚也

至夫國有通商珍怪詭異之物充牣於市則揮斥金錢以求玩好者國君與有力之衆之所同也官府之所積爛然而耀目鏗然而譁耳者內產與外輸之貨兼而有之雖無益於治數夫亦足自娛矣勳貴豪侈之家所飼畜者日微移其財以治耳目之近玩雖民失所附然由此而立者亦日多自立者日多故勳貴豪家其勢日亡降與編戶齊民等矣蓋嗜好之私悅聲玩色之情民所同具無間於貴賤也庸詎能以其身爲君公之故知淺淺者之無益而不向之也哉今夫樂侈靡恣淫佚忘其守圉之重不豫綢繆及於外侮者史之策不一書也就令不至如是使守圉既固矣綢繆既周矣謂方儲其餘資以當一旦不可知之變者如是之君吾未之前聞也雖在恭儉之主其歲費亦與歲入均下者斯過之矣是故古昔積聚之業今也則亡亡積聚而猝有非常之變不能不於其國資非常之供也法之顯理第四亡者數十年於茲矣而普魯士之先王繼去是二主者歐之獨有儲蓄者也至義大里之民主與荷蘭下國之合衆有通負矣民主無巨細有府藏者獨瑞士之蒲納其他民社則無有也雖



然是亦宜耳。居文物休明之世，倡耒耜采椽之說，則似蠻夷之陋風，而非文明之盛觀。是以陳設之都麗，廟廊之高明，凡所以爲國華者，雖在民主政廷之儉節，爭爲敦美，不異霸朝雄主，肆其侈心者也。

夫國之經費，平時既僅足而無餘，及其有事，非稱貸以濟之固不可。所有於府庫者，足以供無事耳。一旦四郊多壘，或攻或守，其費皆無從出也。況守圉之費，恆三四倍於無事時之度支，非籌三四倍之歲入，必無以爲戰守之具。就令致此有術，而舍加賦無他道也。卽賦加矣，而非期月之培克聚斂，不能集也。其有民不堪命，平時之供已盡其力，加之且至內亂者，無論已。乃邦交則既裂矣，宣戰之書則既馳矣，舉國若焦，陸兵調，海旅集，臺壘脩，戍卒募，簡器而聚糧，電迅而雷動，不旋踵矣。其待費之亟如此，而費之不可數計，額限又如此，一有失機，大者國危，小者國辱，則欲待期月之培克聚斂以應國已非其國矣。是故當此之時，國家舍稱貸之事，無以自救。

自有通商，而人類相生相養之局大，亦各爭權利而列國相攻相取之事繁，雖然，國

以通商之故而戰事殷亦以通商之故而財有所資蓋國與國相齟齬矣而民知戰勝則市場廣商利宏故前也既以商而有餘資而今也亦以爭商利而樂出貨也使其國之商賈衆而工業多則必有民焉以轉財爲業者其所轉於手中之財不僅己之母財己也且將有他人之財所不自興業而以貸人取息者其出入之數數亦必過於不自興業而獨貸財以取息者蓋彼既不自興業矣則一歲之中財之轉於其手者率不過一出入而已至於工商興業之民其己之母財與其所資以爲母者轉於其手歲三出入至於四五者有之矣故如是之民身爲工商二業之主者誠欲出財以貸國家雖鉅萬之數可咄嗟辦也故曰惟通商之國多戰爭亦惟通商之國之民能貸財以助戰

非刑政至平而愛民有護者其國工商之業必衰就令暫興其勢亦不可久也蓋刑政不平民雖有恆產常以爲不可恃質劑不信吏不爲司其直脫有逋負訟獄之紛吏上下其手而估勢者勝往往其財雖復請囑之賊失大半焉故國有法而若存若

亡不爲民所信者其工商之業欲興而日進於盛隆之際難矣惟無事之日民信其上任其法知其於己財產爲有護也夫而後處非常之頃能以財供上之用而知其不亡也誠使其上可信其法足任則工商之家以財貸國不獨於發業勸功無所稍損而如故也方且以出貨國財之故而其業益恢蓋國事有急其稱貸之質息契約恒大優於貸者之家且貸者所收之符券周流於民亦以民之信其上任其法也往往入市所售過於所貸之數然則民以財貸國轉以利藏不獨於其業之母財無所減也且有加焉故上之資財於民也爲有大資於貸者之家豈復以爲病抑且以爲澤故曰惟法行政平之國爲可資財於民亦惟法行政平之國之民乃樂出財貸國也。

如是之國常深恃其民之能貸而樂貸也無事之世常無意於聚斂而封殖之蓋豫知一旦有事資之無難則閒暇之時無假自苦以積畜之事矣

若夫倖野之國民無工商二業之母財抑有之而禁寡人人以居積蓋藏爲莫大之

事知其上之厲己與其法之不可信也則諱其財恐一著於外之見奪也如是之國一旦有警則多文告設勸賞以資其財於民然而民能以財貸國固少矣求其樂於貸國則無徒也其國君知其然也則平時務聚斂而封殖之以自固然而聚斂滋深封殖愈厚其民愈危終之至於有警其聚斂封殖者恆不足以周事蓋惟不通而民力以薄惟無政刑而民疑其上惟視一人之培克而其流易竭故也夫若此者雖曰國非其國豈太過哉

案君子讀斯密氏此篇之言而反觀吾中國之爲何如國爲此乎爲彼乎蓋不待不佞之斥言夫已各知其攸屬矣數載以還國亦多故矣工商之業倏然而國債彌重且其債非資之於民也官資之於外國而外國轉而資諸吾民者有之矣豈盡民之無良哉民無所恃於官而外國無所畏於中國故也往者亦資資之於民則昭信之股票是已然其事之何若又不待不佞之斥言也庚子之歲行將盡矣和議十二款出國之逋負益深後之財政將必有越樽俎以代吾庖者使繼此而

民以病其事固可悲使繼此而民不病其事尤可悲變有謂法終當變不變於中國將變於外人昔聞其語今見其事矣

債有日加無日減今所以困後或以亡此今歐洲諸國所處之同形也國如家然其始之資財也以其主人之聲望地勢不必有所典質抑指一定之款目以爲償也及其所資愈多持空名白券不足以見信則質田宅其契徹而後能得之

今者吾英之國家有所謂不指之債者則以前法而資諸民者也不指之債有行息者有不行息者其不行息者如私家計帳之通負其行息者如私家之以券據稱資者矣國家興一功役行一師旅先其事而後其費則若海陸諸軍之糧餉鄰國君王之伙助皆有所後時而不及者如是之債則無息者前一事也海部若大藏償之以一紙之吡勒有起息於發執之日者有起息於六月以後者如是之債則有息者後一事也於是英倫版克以見幣豫息收其所頒用者市有定價或大藏欲其吡勒之流行與常鈔等則令版克平稱爲受而付之以屆期之子錢如此則市價不跌民樂

行用若此者雖償甚大之逋抑舉新貸之債無所難也法國舊無版克而有國鈔其當市之價折扣至百六七十者恆有之而吾英於威廉第三之代國家大脩園法英倫版克停業其時大藏咄勒市中折扣者自百二十五至百去六十者有之蓋其時民心未定政府經民變新造而又不爲國家版克之所佑助故如此

凡此皆所謂不指之債也至所貸者多而不指者爲不可行則遇巨功大役若戰守之事需甚浩之費告貸於民非指有著之款以爲質供後此之還償不可得也故政府以質貸財於民亦有二道焉一暫一久暫者取國家經入之賦以爲一歲數年之質者也久者責息於一事而永永無絕者也暫者計此限期之中足以復所貸之財之子母久者置母不償計其賦之所收可以與其所貸之歲息相準國家無論何時力足以復其母者則復之而其息亦罷其以前術貸也謂之曰探支之債其以後術貸也謂之曰永息之債亦曰息借之債

如大不列顛歲征之地賦與麵粉之稅皆以供探支之債當其責賦戰之功令者也

國所需款。英倫版克恆先完之。而徐計息。此自民訛以後。常率百八至於百三者。徐收二賦。如其子母之數而止。一歲不足。則次歲繼續以收其征。其常法也。國家所未質之歲入。僅此而已。顧常未至而前費之如此。此如豪家浪子。待用甚棘。欲徐以俟其田宅之租入。勢有不能。則以息貢於其司和之奴僕。此所謂出歲息而用其家應得之財者也。

當英王威廉與后安之代。國舉永息之債。未數數也。然而始爲之矣。故其時所增新賦。常以少時而罷。（自注四年五年六年至七年而止。）一而其時所予之資財券約。大抵豫探所賦之入以復之。往往限年之中。所收者不足以復所資者之子母。於是常不得已而展期。

一千六百九十七年。是爲威廉第三之八載。總一切新增之賦而不足於用。則擇而展之。至一千七百六年八月朔。以探支五百一十六萬四百五十九鎊十四先令九便士之債。是爲第一次公息質借。

一千七百一十年復展專稅至一千七百一十年八月朔以探支所不及之債二百五萬五千九百九十九鎊七先令十一便士半是爲第二次公息質借

一千七百一十七年復展前稅至一千七百一十二年八月朔以探支所新借之債九十八萬三千二百五十四鎊十一先令九便士是爲第三次公息質借

一千七百一十八年復展前稅至一千七百一十四年八月朔以探支九十二萬五千一百七十六鎊九先令二便士半之債是爲第四次公息質借（自注所不展者獨舊助餉之噸錢鎊錢及蘇格蘭之麻布稅蓋南北合而優免之）

一千七百一十九年復展前稅至一千七百一十六年八月朔以探支九十二萬二千二十九鎊六先令之債是爲第五次公息質借（自注舊助餉之噸錢鎊錢於是歲不探支）

一千七百一十年復展前稅至一千七百一十二年八月朔以探支一百二十九萬六千五百五十二鎊九先令十二便士之債是爲第六次公息質借



一千七百十一年則令舊征諸稅益以新設數款之永遠調權以供所探支民債者四兼還南海公司之息利南海公司者於是年以九百一十七萬七千九百六十七鎊十五先令四便士出貸國家者也是爲英國家由來最大之公息質借矣

先是國家資於英倫版克者凡三百三十七萬五千二十七鎊十七先令十便士半其歲息凡二十萬六千五百一鎊十三先令五便士又資於印度大東公司者凡三百二十萬鎊其歲息凡十六萬鎊版克息率歲百六大東公司歲百五於是稅之指還是二債歲息者皆永遠征抽是爲永息國債之首基矣

一千七百一十五年是爲若耳治第一之初載凡賦之指爲版克歲息者與他賦之永遠征抽者皆總之於一司號匯集公帑以供版克公息債之歲息及他項國債之永息者匯集公帑至若耳治之三載五載各有他賦之附益其賦亦皆永遠征抽者矣

一千七百十七年是爲若耳治第一之三載復廢他項永遠征抽之賦以供後資民

債之永息號總帑其所支之歲息計七十二萬四千八百四十九鎊六先令十便士半。

合前載而觀之知國債之興也其始皆探支後數年之賦而爲之而其債所指之稅大抵不過限若干年期於通債子母而賦亦止矣乃至軍興旁午抑大功殷煩往往前負未償後探更起通債積累至欲還其母而力有不給則探支者浸假皆轉爲永息之債而供息之賦亦有欲獨罷而不能者矣。

今夫國處交通之世與人並立於五洲之中雖不幸而有戰爭之端與不獲己而有守圉之費然皆意中事耳當其時府庫空虛公私赤立則其勢不能不出於假貸資邱山之費於其民而指有著之賦稅通計幾何而償其子母此猶是至公甚便之道也向使一資於民之後彼爲國治計者於通負未清之際日月未除之時謹其外政勿輕啓邊疆之費謹其治內勿妄有功役之興清靜爲治以與民休息則年月之間前之所探支者子母皆復則澼然釋負可也此匹夫匹婦之智之所知能而謂預人

家國者其勢有不逮哉。乃孰意不然。吾歐乘軸操柄之家。其所爲往往反此。此諸國之債所無日減而有日增也。當其爲第一公息質借也。其所探支之數。既往往溢其所指償者矣。脫有未溢。則必於前期未屆前負未了之先。而爲第二公息質借之事。至於積而彌多。則所指之賦額。於定期之中。萬萬不能償其子母。如此。則愈益其母。而前指之賦。乃專償子。不恤其餘。夫然後不獨負之無時而釋也。而所指之稅。事爲此起者。亦無由輕省。而使通國獲息肩矣。孰生厲階。至今爲梗。此言之足以令人於邑者也。尤足異者。以其鹵莽滅裂之爲。而前者探支之債。既漸長而爲永息矣。既變有窮之累。以爲無期之誅求矣。今乃以國之所歲償。可子而不母之故。後之所貸。可以加多於前。故自永息債行。當國者以此爲新得之秘。脫有大事。則往往爲永息而不爲探支。而民之調權。亦從此而益重。嗟夫。國家不幸有急。彼當國之慮所斤斤致謹者。在濟其目前之急已耳。至於債負積而不訾。後之子孫。所以償復之道如何。調權益深。得無毀於壓力之下。則所謂我躬不閱而未嘗一概其意者矣。此非所謂不

仁之尤者耶

案國債一事爲中國從來所未有。國家當全盛之日。邊事如平噶爾。如西藏。皆以司農之財供之。而有餘。至道咸之間。憂貧乃始。然未嘗加半文之賦於民也。粵匪之亂。諸公籌餉。始創釐金。謂爲權宜之計。而兵食大舒。又是時海禁方開。始於上海。繼而有十三口。二十餘口。海關之權。考中國今日之歲入。以比嘉道以前。蓋數倍不啻矣。而憂貧之象。日加乎前。狙於舊說者。輒以通商爲絕大漏卮。甚且擬之鬼魅。惡人。攝吸膏血。如其言。與往者印度那博之語正同。究之此皆無所知者之臆口。讀斯密氏原富之書。而其胸中如是之見。納洗除不盡者。則無庸發其墨守而箴膏肓矣。同治以前。邊釐常起。然所謂賠給兵費者。至數十百萬爲最多。中國之力猶足以及。無舉洋債而表分償也。以政事之闇於外情。而疆吏網繆之。不固。於是乎有甲午中東之役。朝鮮臺灣皆割。而賠款至二百兆有餘。而關權爲指償之賦稅。幸而邊氛不起。海內和樂。三十年間。可以子母皆復。而百姓不必加賦。

也。本年庚子五月，暫然有拳會滅洋之事，其人謀之不臧，殆前志所未有。七月

乘輿西狩，至十一月而十二款之和議盡諾。後此所賠之兵費幾何，頗聞分年以復所賠之債，須歲三千萬者五、六十年。一此書成於光緒二十六年十二月，故云。一如此而益以前負，則中國財力不其殫歟！自西人觀之，彼固夷然以爲未甚也。蓋彼見英倫者天下之富國也，而庚寅辛卯之間，其國債爲六百八十四兆鎊，以三十七兆八十萬之民數計之，每民所負蓋一十八鎊有奇。至法蘭西，則尤駭耳。日矣，庚寅辛卯間，以三十八兆之民，而積一千二百六十五兆鎊之國債，以每民計，蓋各負三十三鎊有奇。其歲出本息亦三十七兆八十一萬鎊，然未聞英法二國遂因此而貧，抑由是而不振也。中國後此之債，要不外一千兆兩銀已耳。此不過二百六十餘兆鎊，而其民號三百餘兆，是不及人一鎊之債也。復何憂乎？雖然有辨，是二國之債者，大抵舉之以治軍，則有拓國攘利之饒，以之興功，則又有便民通商之益。故國債雖重，國財日休。此猶斥母以來贏息耳。至於中國，則十年之

中喪師者耳。其舉貸者皆國外之款。其所償者皆敵國之費。故債重矣。其息利既不在民。於國財又無所增益。而一切通商惠工之政。若鐵道。若礦政。方務制其發生之機。是中西之負債同。其所以負債者大異。而後此之所以償通散息者又殊。西國之債以利。中國之債以害。是又烏可同而論之乎。繼自今。設不取財政一切而更張。抑更張矣。而其權皆操於外人。吾誠不知國之何以堪命也。

后安卽位。通國通行息率。大抵百息五六而已。洎十二載。令私家貸貸。至大之息。不得逾五分。而當此時。暫征之稅。什八九皆永遠抽征。以資償息。若所謂匯集公帑。南海公帑。總帑。皆此用也。於是公債之息。亦減之與私債同科。而諸帑之所歲償。省百六而降爲百五。是所省者六之一也。於是歲征有餘。則積之以徐償債母之用。所謂沈債帑項是已。當一千七百一十七年。沈債帑項共得三十二萬三千四百三十四鎊。七先令七便士半。至一千七百二十七年。息率以通行之率相比。更減爲百四。其五十三五十七二年。減爲百三五百三。而沈債之帑愈富。

沈債帑項所以漸償舊負乃有此而貸新債愈易蓋所積既多民知公家之有餘財樂於出貨當國有事主者舉之以與他項游移之帑相輔爲資則舉債彌易故大不列顛於沈債一帑用之以償舊負抑用之以舉新逋二者孰多觀諸後來悉可見矣國貸公債其術有二一曰探支一曰永息固矣而二者之外又有二焉所謂歲收是已則介於二者以行其術者也一曰歲收之有年限者一曰歲收之終於生年者當威廉后安之二代常貸鉅帑於民而以歲收之有年限者分還之其年限或長或短視其時之民情爲上下一千六百九十三年以議院之令貸一兆鎊於民凡貸百者歲收十四至十六年而盡是國家所歲還者十四萬也先是一千六百九十一年亦以議院之令貸一兆鎊歲收取盡生年而止其數以今觀之可謂至優顧其時貸者不滿所貸其次年乃易爲出百歲收十四終貸者生年而止如此是歲收七年有奇其所貸於國者已復也一千六百九十五年令民有此歲收者得詣大藏出六十鎊之財則易所謂盡年而止爲九十六年而後止蓋國家以盡年十四之歲收與

九十六年十四歲收之較售以與民而得其六十三鎊之價六十三鎊者以歲收十四鎊計僅四年半而復者也。可謂優矣。雖然以其時國勢之臬兀政府之不安其至者仍寡。后安立數數舉資於民。有以盡年歲收者。有期限三十二年八十九年九十八年至九十九年者。

歐洲近世之戰事興一起於一千七百三十九年一起於一千七百五十五年其籌國債無有歲收限年者亦無有歲收終其生年者。吾嘗謂國家舉一民債而以九十八九年分歲爲還則其去永永行息者不遠矣。則二術之所責者宜鈞也。顧有財之民以爲子孫計深遠者其以資貸國而食歲利常喜其無窮之永息而不樂有限之分還何則有限之債時愈久遠將其償之所售愈賤故也。凡此之民大抵皆有田多積之家是故債之有限而分年爲償者雖以數計其利實與永息者等而民之購者終樂永息而不喜限年。新資忽起聞永息而母常存者雖微所樂聞限年分償而母漸收者雖久不訢此固小民之虛淺彼固以前之母爲常在以後之母爲漸亡也。



於是當此二戰之時。國家遇有資財。每於永息之債而外。別益限年或終身之歲收。以爲勸獎之資。歲收雖盡。而永息之母自若。其爲獎之優如此。

以終身之歲收與民。以爲國資財者。亦有二術焉。有分者。有合者。分者各得其終身之歲收。如前之所列是已。合者聚數人數十人之身世而爲之。其法創自法人名湯廷者。故亦名其債曰湯廷之債。當其分給終身歲收也。每一人死。則歲收與之俱盡。而公帑所出。以之還輕矣。合給終身歲收不然。聚十民爲一湯廷。其始各給歲收。至一人雖死。而公帑之所出如故。其所應得者。歸諸餘九人。復一人死。則二人之所應得者。歸諸八人。如是至於九人前死。而一人獨存。則是一人者。總集十八之歲收。必俟十人偕亡。而後公帑無所出。此所謂湯廷者也。故國家同指一款一賦。以爲後債。而用合以資者。常較用分以資者爲多焉。蓋湯廷歲收。其所值固比分者爲多。常人之情。皆自信其身之後死。其晚境之多娛。故湯廷之債。其售人也常過其值。此與民間彩票之行。實有同其機括者矣。近者國以歲收與民。以資公債者。用湯廷之法者。

多於常法蓋舉貸者之意固主於多得財而公帑釋負之遲遲乃彼之所不遑計及者矣。

持法之公債以與吾英者比則法之以終身歲收與民爲貸者多於英一千七百六十四年爾爾多議院所進法王之債冊法之公債總二千四百兆利佛其母之以終身歲收資者約三百兆蓋於全債僅八分之一而已全債歲息約計一百二十兆而歲收居其四分之一乃三十兆也此其計數或以爲不盡翔實顧自議院爲之則難違不遠矣夫英與法資財於民之術其殊如此此非二國主計者深慮遠求爲公家釋負之意異也其所以然者則亦以貸財之家其恤私顧財所各爲利圖者不相侔耳。

英國政府之所在乃天下商旅輻湊鱗集之區其中之民大半商賈而以財貸國者也然彼之以財貸國非於其母財有所耗減而爲之也乃欲母財之增益而爲之耳故朝出其資以購新債之股票暮出售人而無所贏得者彼且去之夫豈曰自損以

助國家也哉。使彼所購者非永息之歲收而爲終身之歲收（無論本人或他人終身）則其轉以出售也未必有贏也。終身歲收之債票以之出售大抵皆折。蓋他人之身雖年齒精力與已從同其視之也必劣而其價從之以微。甲以乙之債票與丙自甲丙之視乙均也。均則授受之價宜相若矣。而終身歲收之債票從其實而言之自其發給之日其本值已遞減矣。何則人之年齒固日增精力固日微也是故出以相售終身歲收之債票終不若永息而母存之債票母存固其價相若也。

然則法何以獨多終身歲收之債票乎。曰是有故。法之都曰巴黎巴黎非天下商業之所萃也。故其以財貸國也其人不皆商。其中操利之民有承抽之牙儉不牙之稅則有監抽之家。又有爲國王主藏之版克。若此之倫則爲國資財而先出資者矣。其身家多微而驟致富則夸炫敖惰視其儕輩蔑如也。故其婚娶也取己之同類則不款攀援所慕則不可輒得。故往往以鏹其終身既鮮室家而於親戚又無愛也。舍美衣豐食以自適其生而外無所謂遠計者。故雖歲入之饒與其生年俱盡非所介介。

也。蓋法以政教之不同，其中多財之子，或不願有妻，或願有之矣。而於法不可於勢不便，此其民不爲後圖計者，所以比英爲多也。夫既不爲後圖計矣，故與其取永息毋存者之爲少，無甯取終其身世者之爲多也。此英法貢財於民，其術之所以異也。輓近各國平時之經費，大抵與其每歲之經入相敷。一旦兵事告警，所費加於平時，則常苦無術以比例加賦，即有之，亦有所忌而不敢爲。其有所忌者，恐賦稅加煩，民滋不悅，將即此以爲主戰者之罪也。其苦無術者，兵事之長短無期，其所費之多寡不可前計，縱出加賦，不知何由使足用也。故惟貢財於民，而二者之難皆失。蓋惟貢財而後所用之公費雖多，而所加之賦可以寡。至用永息之術，則加至少之賦，而所貢者雖若邱山，以供連年之戰費可也。國之幅員廣遠，雖有一方之警，其京師腹地之民於戰之不便，無所與也。耳不聞燄火之聲，目不覩戰鬪之苦，雖一方之民，極人生最烈之災害，而彼晏然者，依然優游而式飲食，惟日讀邸報以兵事爲娛心遣意之資。勝則夸其國之武功，負則僞其海陸將卒之不奮耳。他何關焉？故雖所出之賦

稅略多於無事者之日而彼之心樂也則有時轉以罷戰役爲愠者有之矣所以娛心遺意者亡而前者所夢想之豐功偉業上所冀以爲國榮下所分以爲私喜者又杳然不如其所期此主和者之所以多毀而主戰者之所以多和聲也

稅之增也以有戰事然戰雖息而稅無減時此屢見於事實者也其故以貢債之常有息耳假償息之外而猶有餘國之經費不仰於是則常若儲之以爲陸續還母之地此所謂沈債之帑是已然而有難者就令沈債之帑所積漸多當國者不移之以爲他用而師旅之後疆場無警者歷有歲時是區區者常不足以復其當戰之所資者矧乎是所謂沈債之帑者當國者常不能不以他用也而兵爭之世無事之不可以長也

其帑之所以常區區而不足以復所資者蓋新賦之設非以償所資之母乃以償其歲息而已爲此而有餘其有餘者必意外之獲而非制賦者之始望也故其數所以常少一也且沈債之帑之所由來非償息之外其賦之自然有餘也大抵以通行息

率之減而後得耳。此如一千六百五十五年荷蘭之債。又若一千六百八十五年羅馬教國之債。其沈債帑皆由此出也。此其帑所以常微而不足以復所貸也。

沈債帑所以常爲他川而不必盡儲之以理舊通者。蓋師旅之後。就令歷歲昇平。然既爲國家。則不免於非常之舉。當國之人。所以籌此費者。與其數加新賦。不若用沈債帑。餘之爲輕而易明矣。凡賦舊者雖重。而民無辭。新者雖輕。其民常怨。此天下之通情也。國家當蕭然煩費之日。賦不獨從其無而之有也。且常取其輕者而重之。無如民氣已鬱。往往欲爲其新而無可新。欲從而重而末由重。夫增新賦。民之所大惡也。緩舊通。民之所未必怨也。當是時。謂有可措之資。如沈債帑者。上之人乃舍其易而從其難。殆無有矣。彼非不知公債之所積既多。不可不力求所以釋負也。公債彌深。是沈債者愈不可以妄動也。顧公債之釋負彌難。公費之急需亦彌衆。由此而沈債之妄動者亦彌多。雖有急公愛國之民。然使賦權已重。征調已煩。上之人欲取其無者而有之。欲取其輕者而重之。此非其國存亡榮辱之所關。必待毀家之紆而後

可者。吾未見民之樂從也。用其沈債不得已耳。

或曰。國債於民固無損也。歐洲諸國皆然。而英倫尤爾。債債之帑雖多。政如別積母財。加諸國中已有母財之上。商業以之廣通。工務以之益闢。田疇以之加治。跡是帑之所爲。過於民間各具之母財之所能爲遠矣。雖然。其言過矣。彼不知當國家之告貸於民。而民出財以貸之也。乃取其國之歲殖。不以爲農工商營業之母。而以爲經國之度支。夫既爲度支矣。則必奪其生利者。而以爲其不生利者。一歲之中。虛糜揮斥。無一錢之復者。往往有之矣。吾非不知民以財貸國之後。方將席爲歲收。總始終之所得。常過於其所貸國者。又非不知有此歲收。則貸者之母常復。母復故民依然有以治其生業。其廣遠盛大。或過於前也。孰貸國之據。固可以貢人之財。抑轉售之以得優價。則新母之數。且進於舊。雖然。言計之道。有就人人而分言之者。有合通國而通言之者。自其分者言之。彼以財貸國。而猶有財。或等於舊。或多於舊。其財固無恙也。苟自其合者言之。彼孰貸國之據。其所售所復之財。是新得者。其始不能無所

用也。本國中之所固有也。固嘗用之以發業勸功者也。其於彼雖爲新而於國終爲舊。不過挹彼注茲。有易主而無新獲也。故其財於一家可言復。於通國不可言復也。前此之貸國者。以償敵費。以供軍興。所用之於不生利之功者。已毀矣。已亡矣。向使無此。則所謂新母者。其發業勸功之事。將必有益廣於斯者。而今則已矣。是故未貸國之先。其母財二。既貸國之後。其母財一。誰謂國債於民無損耶。

使國家以歲費之淵廣。而增當歲之賦。是所取於民者。將不過節彼一不生利之費。以供此一不生利之費已耳。向使其賦不增。是所出以供賦者。雖亦積之以爲母財。而以爲發業勸功之用。然其太平。恐將費之於無所生利者。是故國有所需。其出於當歲之加賦者。有礙於新積之母財。而於通國舊有之母財。無所毀。

使國家以歲費之不訾。而濟之以新資。乃指後來之賦。以徐復之。是所取者。將必毀國中舊有之母財。移其養功生利之資。以供其無所生利者。雖然。其後來探支之賦。必輕於當歲所加以供國費之賦。賦輕則民之從之也亦輕。而猶有餘力以爲積。是



故國有所需其出於資財以爲之者雖於舊有之母財有必毀而無沮於新積之母財合前觀之是二術者各有利弊則不能不深望於主計者之折中也

案國有兵事則資民財以爲之此西制然耳中國古今未嘗有也有者加賦（此如咸同間之釐金）與風天下以財助國已耳（漢之以財助邊與今世之報効一資不資雖異其有損於民力均也斯密氏謂加賦則沮新積之機資借則傷舊有之母是誠不刊之論然使民之所出者由於滯財所未用於廢居治業者於其草生財之機尙無損也竊謂助國之事民因獻其所有餘未嘗損其後利之母使其至是未有不怨謫沸騰者矣

雖然使其國用兵之費悉出於當年之加賦兵解其賦亦罷矣然則其民之積儲新母之能力雖當戰而甚微將兵休而加大過於指資者之戰能而誅求方始者遠矣當戰之頃於國中舊有之母財既無損息兵之後其民又有新積之母財其交綏之時必短而國民亦不敢易言兵蓋用兵之資悉出當年之加賦其所加者必重民不

堪命人人有釋紛排難之心。而國家慮民之累。必不敢得已而納戰也。夙知軍與所費之無涯。而一切皆出於民力。則非有真實之利。與夫不共之仇。其不樂主戰明矣。故其國積儲之能力。所毀於兵爭者。其時必少見。即不得已戰矣。其兵連禍結之爲日必不長。此較之輕言戰。戰而費出於債者。其於舊有之母財既損。且息爭之日。賦之多寡。又不能不加者。自不可等倫而論矣。

案英國察丹沐當國之戰。與爭美利堅之自立。其費皆出於貢財。故當時雖所費不訾。而民不覺。又當是時。瓦德新創汽機。亞克來德新創織機。皆有開必先。利民日用。英之工業恢闊。而商業亦比例而俱進。此其所以任重若輕也。後數十年而有英俄之爭。是爲庫黎美亞之役。軍興之重。舉於貢財加稅者。兼而有之。亞畢沁尼之役。則其資金出於加賦。那達爾之役。亦出於賦。而賦所被者偏。蓋藏富於民深。故雖加賦而民任也。獨近歲與南非荷蘭舊種特蘭斯哇者爭主客之權。兵交不解。至於歷年。徂而未定。其所累之國債。已至再三。而其數之繁。亦出於意外。雖

一國之利  
籍其地屬其民而特人擇於死與自立之間雖亡猶歸嗟夫英國多不善戰之國也然區區特蘭奮其百折不回之氣則雖勝其力已疲矧國力去英甚遠者而輕言戰吾不知所以爲國者矣

謂戰費出於資債則所增稅輕而民力猶易爲積者此亦必所資者寡而歲息輕而後如此耳假令資者山積息已不訾則未見其民之猶能積蓄也今如英國總其歲入當其無事之時已及十兆使其不經探支抑或區還息利則用之有經雖以供至舊之戰可也乃今英以債重息繁之故遂使無事晏安之民其受累之深力微而無從爲積與居戎馬紛紜之日正等今而後知彼始爲探支永息諸資者作俑之爲禍烈也

顧或謂國家負債於民作賦稅以還其息者此雖爲費然自一國觀之固無異取左手之財以歸右手於其人未爲損也財未嘗出國不過移此民之有以畀彼民國中貧富之差未嘗一法丁異也此之謂諛辭其蔽起於商宗之計學自吾於此宗之學

既明辨而審論之矣。意者今於此言可默。而學者自明其失歟。且彼未嘗出國之云。又未爲確也。荷蘭及他三四國之民。皆有吾國之歲收甚鉅。然此固不必辨。就令國家所出之以付歲息者。一一皆受之以吾英之民。不得以是遂稱無損也。

蓋公私之財。大抵出於二源而已。地也。母財也。有母財之散。而後致力於農工商之塗者得所養也。治母財與地之家二類。有地之田主人也。有財之富室與夫役財之大工。賈商也。

田主人以地爲已有。而知其爲殖財之原也。則樂於治地。佃者之屋宅。無者興之。圯者繕葺之。疏其溝洫。而浚其腔涂。凡地主之所宜爲者。雖費彼無所吝也。自有田疇。廬屋之征。而其所收於地者。比例降寡。自有抽調關權。取民生之所用。享者征焉。而百產以之加貴。以其降寡之歲入。易加貴之百產。故治地之費。彼有所不堪任者矣。田主既不爲其治地。斯農人亦無由易耕而深種。故自有地者。受敝於賦稅。而國之農業有不得不衰者。夫豈不然歟。

自國家有抽調關權之征。而百產以之騰躍。彼有財與役財之家。出其所得於贏息之歲入。以易所欲得者。或需或饒。其數皆寡。他國無此。生事之所待者輕。彼且以爲樂土。而思轉適之矣。國家責稅於民。置司征鹽權之吏。以煩擾之。吏數數踵門。而前之思欲他適者。乃今見諸實事。今夫有財與役財者。勞民之父母也。國工以諸業之所待以興者也。自其人徙。而母財亦亡。故賦稅煩苛。不獨農業有必衰也。工商二業從之。

是故移役財與治地二者所收之利。以與貸財與國之人。其勢將使田疇就荒。工商告乏。吾非不知以財貸國者。多即役財治地之家。此其人於國之農工商。固不能無所顧惜也。假使農業日衰。工商轉徙。彼且無從得其歲收之息財。雖然。此則貸財者之偶與農工商合。而非農工商之必貸財也。若僅自其貸者而言之。則貸者之情。於田之治廢。於業之善否。固無概於其中也。僅自其貸財者而言之。彼於田於業。固無所知也。固非耳目心思之所用也。地雖廢。業雖饒。彼或未之知也。彼將不由此而失

其權利也

國之用賦稅以爲財惠者。未有不陵遲衰微者也。始作俑者。義大里之民主國也。其間諸小國。大抵亡矣。其可以言存者。曰稽奴亞。曰溫匿斯。顧皆以債不振而將爲之續。西班牙踵義大里而賦息。然其賦方之義大里爲尤苛。故以國力比例爲論。其受敝也。過義大里。夫西班牙之國債舊矣。十六稔之末葉。其國之所負若邱山。而當此之時。英尙未有一先令之負也。地大物博。莫若法蘭西。大負在背。其遣力亦僅已。荷蘭下國之合衆。其病貧與稽奴亞溫匿斯均。夫國債之衰微人國。其效著前如此。而謂大不列顛夷然行之。可獨無害也歟。

案斯密氏之論國債也。可謂流涕長太息矣。其愛國深。故其用意切。其見理明。故其立言決也。顧英債雖重。而國終以富強者。非斯密氏之言失也。凡物皆有其所以然之故。苟不兼綜而衡論之。此何異見燕飛戾天。而遂謂奈端地吸力之理爲不足信乎。英國自斯密氏之世以來。其所以富強之政策衆矣。格致之學明於理。

汽電之機達於用。君相明智。而所行日新。然自其最有關係者言之。則採是書之言。而棄其疾。以從其利也。於是除護商之大梗。而用自由無阻之通商。既有其利。關土四洲。移虛實而通有無。故斯密氏之言之所以不驗者。蓋山聞其言。而即以其道自救耳。而我今日之中國。因何如乎。甲午庚子兩戰以來。國債之加者。不知凡幾。而其財又皆貸之於外國。他日和議既成。以外人而操吾計柄。區賦稅以爲貸者之歲數。年增數千萬。無名之賦。此非取左手而畀之右手也。大抵奪吾民衣食之資。以爲謀國不感者之圖而已。哀哀下民。逢此百罹。吾真不知所以繼其後矣。

議者謂英之制賦稅以爲貢息也。比諸國爲廉。平是言也。吾亦云爾。雖然。所不可忘者。即有仁君察相。際邦用之不得已。而有制之賦。既已囊括無餘。將欲爲其無苛斂而不能也。今夫荷蘭。合衆民主之國也。其治賦者。又非不知理財者也。乃至不得已。其制賦之苛。與西班牙之爲暴者。同其事。故使吾英舊債之釋負者。無幾。而數年之

間不幸而更爲戰戰而其費財與前者相若則吾英之賦雖厲民不便如荷蘭過且同於西班牙何不可之與有夫謂前有之抽調關稅至於履畝算舟之地稅皆與民優游使有餘力以治其生計即在兵旅未休之頃民猶得以蓋藏有餘使國之所損於其上者俄頃而繕完蓋治於其下猶得以爲善國此誠制賦者之遠謀而足動無窮之煩歎者也故輒近之兵事於英可謂至費矣順和約甫歸吾農業之治闢如故也吾工業之繁興如故也吾商業之廣遠又如故也惟其如故斯吾國之母財爲未虧且自時平以還野之業有益進者觀於鄉邑室宅賃租咸增則居民加庶富之明驗也內產之抽調外貨之關稅皆增夫前是足以見國中銷貨之彌多產物之日夥取英國今日之國債以與五十年前人言之彼將狂而不信願英任之若無事然者是非幸福而可慰者歟雖然英因任其積矣幸勿謂更多而猶可任也亦勿謂債雖屢加吾民之優游自若吾之母財終無損也千鈞之重加銖兩而移他日數十兆之增民氣之煩如魚之訟可也而誰則知之



國債之積。至於既多。吾未見有真能償還者也。或雖償如不償。抑償矣而不足。其所謂償。不出是二而已。故天下之言償國債者。大抵皆荒閉者也。有時頌言不能。有時實不能矣。而姑謂能爲之法。爲以塗飾天下耳目。則不若頌言不能者之爲愈矣。則有如制爲錢鈔。以少名多。以虛名實。此僞言償債者之常智也。今如有半先令之銀幣。用議院之令。若國王之詔誥。命之爲先令。則二十枚如是之幣。將爲一鎊。前之實二十先令者。其銀實爲四翁斯劣。乃今用新制。則爲劣二翁斯矣。今者總國債之數一百二十八兆鎊。一轉移間。償之以六十四兆而已足。此雖名償債。實則僅及其半。而前之以財濟國者。於每鎊各受十先令之欺也。且自其令行。不獨貸財於國者蒙其害也。私家之民。將比例而受其損。假使貸財於國者。已亦負人之財。則所受於國者。猶可施之於人。顧此以財貸國之家。常爲國中殷賑之民。常爲人負而少負人。如此則受欺於公債之餘。將又得損於私通。是以名償債而無其實者。徒困急公無罪之民。使其家產大虧。而於國無絲毫之益。由此而國中之貧富易位。而所富者大

抵皆奢靡無賴之夫而綴勤謹治生務業之家反坐之以傾覆且財在治生務業之家則常不失而加進入於侈靡無賴者之手則常失而漸亡國焉有不病者乎故國帝頌言倒荒不可爲無實之愆以禍百姓非謂倒荒爲可爲也與爲行詐以售欺不若光明磊落實言不能其於國體所傷爲較輕亦於民生之害爲較淺耳

案嗟夫不仁者之爲國主計也其行詐亦多術矣若鼓鑄新幣而以輕名重或印造寶鈔而命無作有終之漏脯救飢無採於貧而泯泯大亂觀之前史與斯同事者皆在叔季之世靡敝之朝可以鑒矣尙憶晉穆之曰閭中大吏鑄鐵錢開官局以爲一切苟且之計旬日之間貧富易位田宅典質者紛紛取贖嘗有舊擁鉅資而窮困至不自存者此余所親見者也當此之時幾至大亂幸其令尋罷而受其害者則長已矣嗚呼焉有仁人在上制民恆產而使無罪者蒙籍沒之禍也哉無論古今諸國至貧乏無可奈何之時則往往出此下策於是謗議起而國隨以亡然亦有行之而不必至是者此其所以然之故又不可不知也即如古之羅馬民主

當布匿第一戰告休之日其亞斯錢舊以十二翁斯銅者別鑄之以二翁斯而稱同幣而是時民主政府之債公債也乃以一抵六焉其侵奪民財不相應至於如此吾黨居今而思其事以爲所不至於謹譁怨叛者幾希矣然而彼行之而卒無罰者其故何哉蓋吾聞其議之起也起於衆謀之皆合發自民會而政府用之不獨於此債然也凡財賦泉幣之議皆如此且古民主國其中小民貧子多資財於富室而富室欲民舉已者之多也即常定極大之息率故不時還則轉瞬而成山岳之通不獨自債所不能也雖在有力有欲爲代債而不得者於是至國家有所除授彼則舉貸者與其意旨之所向者凡以自寬而已蓋羅馬民主之季雖律禁受賄朋黨至嚴然小民之所恃以爲生者終賴如此之資與民會歲時所需之粟而已夫既蒙其惠養斯推舉之際情有所偏亦其勢也又有時以子母之積既多力不能償而又惡借貸之在已則相聚而請蠲通之詔書抑請詔定新程新程者定什稅之數以爲通國償通之新例耳然則令以一爲六鑄爲亞斯者亦所謂新程之一而已以貧民之衆而富

民寡也。則不得已而諾。獨通立新程。此其意亦不僅爲民也。且爲國計。國之政柄。彼實操之。則釋其重負。相與更始。未必非其曹所大願也。使其事行於今日之英。則一百二十八兆之公債。了之以二十一兆三十三萬三千三百三十三鎊足矣。吾聞布匿第二次之戰。亞斯之滅。始由二翁斯而爲一。繼復由一而爲半。翁斯焉。是減其原值至二十四分之一矣。果使出之於英。則今日之債。了之以五兆三十三萬三千三百三十三鎊足矣。而又何憂乎。

以此而各國泉幣之實。更歷數世。皆不及其前所名者。夫不及其前所名者。以輕爲重也。而尙有以僞雜真。其用意蓋與前等。今如英國重一鎊之銀幣。以今國法之所定。所雜銅鏈。不得過十八便尼威特者也。乃今雜之以六翁斯。如是則二十先令所值之銀。將不過與今幣之六先令八便士等。是無異以六先令八便士爲一鎊之。以輕爲重。以寡爲多也。此其所爲。雖不明言。實與法人所謂升名之事正等。升名者。取下幣而名爲上幣也。

願升名之事。雖非法侵民。然無所隱飾也。而以僞亂真。其事常出於姦斯。鑄法之官。新鑄之幣。幣輕重大小之形色。常無異於舊日之上幣。發而行之。以欺其衆。往者法王約翰爲此。以償國債。則令造幣之吏。爲其重之計。以秘其事。即此故也。以下名上。與以僞雜真。二事皆不道。以下名上者。著而爲之者也。劫奪之賊也。以僞雜真者。隱而售之者也。穿窬之盜也。雖然。陋矣。終朝用而夕覺。而國民之怨憤。必加夫前也。幣輕升名。常一變而不復。雜真彌甚。則其爲復也。彌疾。蓋升名之幣。民亦可升其物價。以與之相受。至於雜真之幣。非復舊。其民必不安。而禍至無日矣。

案羅哲斯曰。造幣而雜以下金。大亂交易之事。而民不相信。授估金之價。以大權而受害最深之家。乃國家之所最宜保護者。其害實比升名爲烈。民之怨憤。夫豈過哉。

當顯理第八之末年。與義都活第六之初載。英之泉幣。升名與雜真之事。兼而有之。蘇格蘭當雅各第六之代。亦放而爲此。歐洲各國。雖其前事。大都無一免者矣。

夫謂英之財賦必有澆然釋負之期固爲虛論。即令降而益少已爲難矣。國家計歲費以定所收之賦。餘者無幾。欲其積微償鉅。勢所不能。假使必欲釋之。則加賦一也。減費二也。其所加所減必至大者而後能合此無第三術矣。

使由吾之說。推前有之地稅屋稅。令其益公以溥。且變抽關關權之成法。如前篇所云云者。將黎庶之壓力不見其增。而歲入之所益多甚鉅。顧雖以計學甚精之家。其爲國籌財賦也。即令歲入遞增。國債之降微有日矣。而終不敢謂從此無鄰敵糾紛之事。而國債不至於再增也。

今欲擴英之賦法使之徧於所屬之地。而加諸英產抑歐產之民。則國家之歲入必鉅。是誠有然。然而以英之舊制論。賦不可徒加也。加其地之賦。則必進其民於政府議院而後可。其員數與賦額有相爲比例者。乃者以強有力者私利之所關。以平民固習拘墟之舊見。過於更張。必相愕眙。而深閉固拒。此亦事有至難。不可猝變者矣。今姑無論通舉之可行與否。而試察用英賦法徧於所屬者。其利害爲何如。既行之

後國家之歲入。其所能增者幾何。又既以公溥之道爲之。是英屬者爲疲敝乎。爲康樂乎。凡此當亦吾國言計者之所宜用心。而是書之作。闕之爲不備者矣。昔者摩勒嘗爲烏託邦之寓言矣。使不佞之言。誠迂闊而無當於用。乎要不外爲是書之續而已。夫何忤焉。

大不列顛之正賦四。曰地稅也。曰印稅也。曰抽調也。曰關權也。

持愛爾蘭與北美西印之民力。以與吾英較。則英之地稅固愛民之所任。而美印之民之所優爲者。蓋三土之民。無教會什一之助。亦無算。夫英民有此而不病地稅。則無此者其任而優爲之。宜矣。教會什一之助。使其地無折征之成約。而常取土物者。其有損於田主之稅租。實過於鎊取五先令之地稅。蓋不止得租之四分一也。今假不爲折征。而一切非正屬教會者不計。則英愛二島之間。什一之助。不在七兆下矣。故使無此。則二島民力紆者亦如此數。雖以此益之地稅之中。彼將不知其重。明矣。由是而知北美既無什一助教之抽。其力必任地稅而不爲虐。固知美印二方之

地不若故國委之佃農故不能即租以爲算然英當威廉馬理亞之代其稅畝也亦未嘗即租以定額其爲算雖未精密然足以行賦古既可行於英今亦可行於美抑爲之測量丈田如今米蘭奧地利普魯士沙諦尼亞之所爲亦已可矣

至於印稅則其事之易行固無俟論但使其國之典章文具相若而一切土田室宅之相受有契約質劑者則皆可以征印稅也

用英國關權之成憲於愛爾蘭美利堅固爲大利特宜使商務棧通無一切苛碎之禁防與英等耳賦稅既均則所享之權利宜一此固道國之通義也故於愛則凡可以束民手足者其政宜除於美則冊貨非冊貨無謂之分殊宜絕美有所通何間於去英之遠近則前設非尼斯底爾以南以北之分宜廢矣凡在英屬平均若一則將以關權之不殊其流通無沮與英之捐業正同如此則合爲一國前此境外之商今無殊境內之業矣其市場既大其贏利自優而國稅又烏從而獨瘠乎彼愛與美之民雖有新增之關權而所收於進盛之商業者方酬之而有餘



然則英之賦法所行之於外屬而宜酌改適宜者獨內產之抽調耳蓋抽調所加未嘗盡物常取其饒而用溥者以加之今如愛爾蘭雖於英爲外屬顧其物產與民生所日用者與英無殊則推而行之無俟改也北美西印其物產人事與英迥別故欲其推行盡利勢不能無更張也英內地諸部有產蘋婆之酒與麥酒者其抽調皆有專條即此意耳

英語謂麥酒爲啤兒而美有釀酒以赤釀爲之亦名啤兒蓋名同而物異者也啤兒家而飲之而不可以久置不若英之啤兒成以麴蘖可多釀而儲之以待月日之沽也顧其物家有納饒殆然今使抽調之事視之與英之啤兒同科則監權之吏貌續而氣粗時至民家勢且侵轢而呵斥之是非治以俾民自由爲本之道也故欲賦之平稱而是物在所必稅則與其稅已成之醴醪莫若稅待醞之酒材抽之於製醞之家而不使則莫若權之於運銷之人境也議院之令凡運摩拉斯（即紅釀）今閩中以爲板釀者一至美者每一格倫權一便士而是權之外其以船運入馬沙勿什海

者每一歲首權八便士其山北部運入南葛羅利納者每一格倫權五便士凡此皆變調爲權者矣假如是而猶有不便則民得自占其一家每歲之所銷或以人數言如英國之稅麴或老少男女有異等如荷蘭之稅鹽或用德瑪賓之法所謂英民一切用物皆宜以其法制調權者其法已前言之第行之於且募銷亡之物未必真便耳雖然使一時無他良法德瑪賓所言要未必不可用也

物固有最宜於加賦者以物既非生事之所必需而所銷又最廣非需故賦之無損於民生而不爲虐所銷廣故取之於歲入爲多此如蔗餉蔗酒菸葉皆此類矣故使繼今以往英本國與美之內屬者合此類之賦可徵之於在田在廠之時抑如是而猶有不便則別立廠所受之其擇地或與田廠爲隣或在商步口岸諸所貨主人與監權者並司之至出售之日抑轉以外運之日則收其應稅者如此則民無不便者矣關權之政凡貨出口外銷者不稅是固可行特須有實征知非出口之後復回本國他口者乃可優免關稅英之賦法屬境內附之後所略宜改絃者惟獨此耳

欲總英與屬之戶口賦稅而通計之必求其覈固難即行吾術國賦之所統增者幾許是亦不可以前知雖然求其近者當有道矣往者英與本國以其常法能於不及八兆之民收不止十兆之歲賦愛爾蘭民數約二兆而北美十二部之民數約三兆（自注自其合衆會所報言之則三兆不止也夫北美新造殖民之地而戶口之盛如此殆有夸詞彼之爲此蓋內則以厲自立之民外則以怵所受制之宗國未必實也故言北美西印之民數不得過三兆也一故以大度綜之則歐美兩洲英屬之民總十三兆至矣向者於不及八兆之民歲收十兆不止之賦則同一賦法於十三兆者以比例言當得十六兆二十五萬鎊有餘然愛美二土之中凡所以爲治爲守者又不能無費也愛爾蘭經費合所以還歲息者通兩年爲計盡一千七百七十五年三月歲劣七十五萬鎊北美西印未爭自立之先其度支共十四萬一千八百鎊而新收之地如馬理蘭如北葛羅利納及歐洲所得諸新地其歲出入皆未計數者歲入亦不下三四萬鎊故舉其成數言則所以待愛美之度支區一兆鎊爲之足矣是

所餘者十五兆二十五萬也。有此以供全國之歲費。則所有餘而。以了公債者。可得六兆二十五萬鎊也。沈債帑項之大。既如此。況母還則子從而輕。十餘年以往。減者至疾。則公債可望悉還。而國力有復蘇之一日矣。豈非甚休可願之事也哉。且於此之時。國民喙息。亦可息肩。無藝之賦。得以歲去。凡需物之調。資材之權。皆可勿取。如此則庸率亦減。而百物之產製加廉。有以爭天下之利市。蓋惟其值廉而後求者益多。求者益多。而後供者益衆。庶幾舉國之歲。殖日豐。而勞民之生事日舒。生事日舒。故其用物益宏。而國之賦稅亦從以加盛。此誠國民交富之樞機。而民富則風俗日醇。又爲理財以外之事矣。

雖然。欲其歲賦之所增。倏然即與民數爲比例。是又未必然之事也。蓋稅法初行。民所不習。則不能不多寬貸。且即今無所假借。求所入悉與民數爲比例。亦有難者。蓋在貧陋之國。民所用調權之饒物甚寡。而戶口彫疎。則其隱匿偷漏甚易。如蘇格蘭小民。其用麥酒無多。而麴蘖至於啤兒。費動二種麥酒。以比例言。其抽調之數。皆遜

英甚遠。至於此項抽調。在彼尙無隱匿者。其酒業抽調。若出口之關。推則以民數比例言。在蘇所征。常不及英。此不獨坐稅貨之銷少也。亦以匿漏至易之故。其愛爾蘭小民。則方蘇尤貧。而戶口之彫疎相若。然則在愛爾蘭復此稅額。且不如蘇矣。北美西印之白人。雖在下戶。其居養常比英之小民爲優。而所銷之饒物甚廣。獨至黑種。居美印民數之最多。然爲奴隸。則生事劣於蘇愛之小民。雖然。謂黑種之民。其飲食不充。而所需有權之貨。必劣於吾英之勞民。則又不可。蓋富者之畜奴隸也。如牛馬然。養之將以爲力役也。如此則食之必盡其材。飲之必娛其意。夫而後其力奮而主人利也。故黑奴所日受於主人者。酒幾升。菸幾兩。大抵與白奴同也。雖其物有調權。主人不必以是而減日頒之常率也。由是觀之。則稅貨之銷。以戶口比例言。未見美印之細於他屬也。至於偷漏關入之弊。則以其地戶口之寡。荒曠之多。誠恐不易盡察。然使舍其凌雜細領。而獨征其一。抑舍酒漿而前征麴蘖。吾未見偷漏之果難察也。內之抽調。外之關推。皆遺其細而專於其大。則將一轉移間。是二稅之所收。必與

其所銷售者相比例不必戶稀之國其逃匿之賦遂溢於衆民之邦也

議者常稱北美無金銀泉幣其境內懋遷所資以通轉者大抵皆用寶鈔即有二品見幣皆致之大不列顛以易其生熟之貨物自無見財故亦無以供稅彼以謂吾英既取其金銀而幣之矣彼又安能出其本無者供國用乎蓋時人之論如此

雖然今北美之所以無金銀者非緣國貧而後爾也亦非其民欲致斯二者而力不足也夫其國庸率致高而糧食價於英爲賤庸高而糧賤則其民誠欲其物無論何者必能致之故北美金銀之寡非以貧也本非所急而未嘗易而有之也

今夫二品之所以便民非有之而不可者以境內境外有交易耳境內之交易可以楮幣行而其便不遜二品者吾於部乙既以云矣北美地廣而民疎故居其土而多資抑致物產而有餘則出之以易金銀二幣資交易也不若施之於地具器用凡物材治斧斤耒耜之爲有利也蓋財成金銀則滯以之備器服時則有所生而日中之市又不可以無易中則其政府製爲楮幣以前民用蓋往往甚足而大有餘焉彭斯

爾花尼亞之政府。嘗出鈔以貸居民而收厚利。他如馬沙蜀什。則以鈔爲國用。待其折減。而後以價稍稍收之。如在一千七百四十七年。其政府嘗用是術。償太半之公債。償者僅及貸者十之一也。蓋其民以不用金銀爲便。而其政府以鈔爲之易中。此而不盡無弊。然通國之費。所省大矣。自其鈔流轉之。既有餘。故金銀見幣。爲所擠驅。而市不多見。此其情與錢者蘇格蘭用鈔之日正同。美與蘇之無見幣。皆不以資。而緣民之發業趨事者多。斥其財於常住循環之二母。以金銀爲滯財。以鈔爲周事耳。北美西印諸英屬。其與英爲易也。自不能不用金銀之見幣。然亦不得已而後用之。其不得已者。亦不用也。至不得已之時。吾未見其無金銀之用也。

產菸之屬。其與英通也。則與英爲賒。其爲期甚久。時至而後以菸償之。蓋以菸償價。固甚便於產菸之屬。而英商得此。運售於英。所復者常不止於原價。是倍稱之利也。斯亦便之矣。商以貨貿易者。不儲待支之見財。因之而亡息利。行店屯棧之儲貨甚多。而交易之通禁廣。雖然。以一商而與衆商交受。衆商之幅湊。不能皆償之以一宗。

之貨也。獨英商之與威占尼亞馬理蘭通者。其利甚厚。貨出常樂。以英爲之價。英之銷美菸數廣。得菸有餘利。得金銀無餘利也。故英商與二地之商通。其金銀爲無用。然則境內封外之交易。皆不仰於金銀。而二地之見財。亦坐此而漸少。願是威占尼亞馬理蘭者。非貧屬也。其雖盛熙穰。有過諸他屬而無不及者。

其他以北諸屬。若彭斯爾花尼亞。若奴約。若紐若西。若紐英倫之四省者。其出口運英諸貨之所值。常不敵其所受於英之熟貨。如此則有出進之差。故其償英也。有金與銀。而二幣常足以給事。未嘗闕也。

產錫之屬。其與英通也。總諸貨之歲所運英者。其值不及錫。假使所受於彼者。皆必以金銀補出進之差。則西印之通商。正商宗計家所指爲最不利國者矣。幸而產蔗之區。主之者多英民。而猶居於國者。其歲租皆任土而以錫納。西印之商。所收之錫與蔗酒。則又不及其所售於彼之雜貨。如此則必有金銀以補其不足。而金銀又未嘗闕也。



顧有時而取償祇滯不應期者其故又不在進出差之大小致見財有難易也美屬之償英通也大都北部易而南部難北進出差雖多而仍易南進出差雖無有雖小而尤難蓋償通之難易恆視其屬曠土之多寡曠土多其民之需母財急往往區地延廣過其力之所堪如雅墨加島荒土猶多故其民之償通較之巴白圖安直瓜聖古力斯托福數小島地盡闢者爲難滯矣其他新地若古冷那達若吐拔戈若聖維因生若多明尼加皆以用母至多民靳其財留以發業而償通不期夫豈貧哉故屬地之金銀少者其故非以貧乏蓋財用於興作食功者多而易中則取其至廉之格幣至於必用未嘗闕也其有力短信淪者其故亦不山貧而山興業擁地之過廣其短於財正由於貪財吾英所征於彼之賦稅兵刑所用經費之餘設捆載而歸宗國即用黃白彼其力猶足以任之特務廣貪多之情不能不遜耳英商之治美業者多設有所逋兌但以毗勒爲之角尖之金銀不必出美可也

夫英之國債之重如此就令責愛爾蘭美利堅二屬之民相助爲理非不公也蓋英

民出無窮之力變舊邦而爲新國此不獨英民之樂利也愛爾蘭從新之民其所享之權利身家之自由產業之安固實以之且自新朝立而北美諸部有冊書而其民享平刑真教之幸福優游泮奐樂業安生豈可不知所自且國債之降而益豐者大抵以禦外仇保疆土耳其所保者不獨宗國也殖民之屬通商之步兼而有之輓近之戰用財最多則直爲美而後起事耳夫既同享其利矣則使之公任所費誰曰不宜以愛爾蘭而與大不列顛合其利不僅商業宏通而已也總而核之雖以合而賦稅增加其所得必過所失遠矣往者蘇格蘭以合於英而爵貴之權大減小民意氣大以發舒今愛爾蘭小民其受爵貴侵漁可謂至矣惟合於英而後可以免此且愛之爵貴與蘇格蘭異蘇之爵貴大半皆舊家豪族而愛之貴介多起於教宗與政黨故其爲侵也愈虐而被侵者愈怒此愛爾蘭內訌之所以多於他國也使愛爾蘭不與英合吾恐其國勢內崩雖數十百年民氣猶離析而不可和而爲一也

美屬無爵貴皆齊民然不得謂以此合英遂無益也蓋齊等之民以其勢均而分門

戶相持不下。而國常以不安。向使不轄於英。將其紛爭彌甚。故未議自立之初。諸黨以有約束。塞消撲炎。勿使已甚。而美屬以甯。今若壓力盡去。則不相下之勢。將不旋踵而化爲兵爭流血之事矣。山來大國。統以一君。其朋黨之紛。遠勝常較。近畿爲遜。蓋近畿權勢政門之所在。黨人所爭。往往在此。去之益遠。則其所爭者。亡而憤氣亦定也。故蘇之黨禍。常不及英。設繼自今。諸屬內附。將愛爾蘭之黨論。且不及蘇。而美印諸屬。尤當將謐。吾非不知諸屬內附之後。其賦稅之重。爲前者所未有。然政府得有餘之賦。國債早了。歲息降輕。行見數十年以往。全英之賦。取足平時之度支而止。是重者一時。而不重者無窮期也。

國家拓土開疆。西有美洲。而東有印度。印度者。國民之所有。而非公司之所有也。使有術以治其賦。則國之歲收。將有大於右之所列者。其幅員既廣。而地力至腴。以器積比例言。謂富庶過大。不列顛可也。順其地之賦稅已重。不可復加。閔其民之不幸。直當多所蠲舍。而後爲宜。治之之道。非加賦也。取已有之賦。而加綜核焉。國之所收。

夫已不可勝計矣。重賦云乎哉。

國而廣其歲入。其術無他。增賦稅以厚其入。節經費以謹其出而已。增賦厚入之事。具如右矣。使其事有不可行。抑所增有限。釋負無期。則舍節費無他道矣。夫吾英取民完賦之政。固尙有其可脩而益加精密者。願以較諸國之賦政。則英尙有一日之長也。無事之時。其所以整軍經武者。他國財力兵威。遠不及英。而費過之者有之矣。然則其事因無費之可節。明矣。獨平時藩屬之費。實非綜核而可省者。猶多。假使費無從出。當罷其事。況以有藩屬。邊費易開。一旦決裂。而以兵戎。則邱山之費。尤非常用區區所可方擬。近日之戰。其費於大不列顛者九十兆。則純爲藩屬而後有一千七百三十九年西班牙之戰。繼之而有法蘭西之役。所費亦過四十兆。其事亦由外藩。蓋後加之債。所爲手足而空腹心者。實倍於戰前之原數。向使無此。則舊負全償。未可知也。使不爲所屬。則前戰之有無不可知。而後戰之不行。殆可決也。蓋國民之意。以謂藩屬者。全英之一部也。如手足之助其百體。這惜費乎。願手足之護其百體。

者以百體之衛其心腹也。苟不衛腹心，即非百體。今外屬於英，財與兵兩無所助矣。如是者，謂之附贅縣旒，徒用飾觀而已。然使其財之足供是飾觀者，誼固當已。當已而不已，竊恐周防之費，後且益加乎前。英之君上謂其民曰：吾於西海有莫大之疆土，雖然是徒懸諸虛願而已耳。非真有此土者，方經營之，而不可以入版圖充國計。惟經營故有常所費，而無所利，即專其市是方爲失，非爲得也。是以及今日，英之爲政者，宜實副通國之所期。此而不能，則宜幡然改圖，而毋爲無窮之費，徒空心腹之財，而以爲附贅縣旒之飾觀。吾亦見英計之爲得也，且亦反而圖其本乎。

光緒二十八年十月南洋公學  
譯書院第一次全書出版

書經存案  
翻刻必究